

漢
石
例
一







漢石例
(一)

劉寶楠錄

漢石例序

文生於義。不生於例也。義洽而例自立焉。故不獨春秋有例。若易、若詩、若書、無不有例。其例卽定於聖人。精義之心。非有所比擬景傳也。爲文必當明例。碑志又文字之最謹嚴者。其例尤不可不講。元潘景梁、王止仲、明黃太沖、遞有所述。然取法不越昌黎。是謂昌黎以前金石之文。皆獷語也。先河後海。豈其然乎。古人副鍾範鼎。義專襲顯。面人儷事。不患本末不審。故款識流傳。類皆鑿楛行能。文質究宣。但主銘勳。不關記事。變金爲石。其義猶是。其例亦當猶是。秦漢以來。矩矱具存。可覆驗也。自昌黎一變而爲述事。後世史籍踳午。往往足資考證。故各家文集碑志。尤爲可貴。昌黎之功。誠亦不細。然不得因後掩前。反疑古人。渾噩爲不達也。朱竹垞嘗謂墓銘莫盛於東漢。鄱陽洪氏隸釋隸續。其文其銘。體例非一。宜用止仲之法。舉而臚列之。竹垞旣未有成書。錢唐梁氏志銘廣例。吳江郭氏金石例補。嘉興馮氏金石綜例。搜采較博。舉例尙疏。至長洲王氏碑版廣例。雖上取秦漢。下訖中唐。其指乃主於摧毀漢人。專以文章正統與韓歐。其言曰。漢碑版之在世亦多矣。或奧而賸。或枝以蔓。雖或得焉。其所得常不敵其所失。又曰。漢碑版不皆出於文士。乖離析亂。人率其臆。未嘗有例也。噫。古人物勒工名。一器且不苟作。何有旌功寫德。託垂千億。乃

會不得一文士爲之操觚乎。晚近尙欺心之學。且有專標柳子厚、馬少監、張子野、黃夢升諸文。以爲碑志正宗者。是并韓歐之例可廢。何論漢也。吾友寶應劉君楚楨。始本竹垞之意。壹以東京爲主。傳以經術。加之博證。纂爲漢石例六卷。蓋惟深通漢學。故能得其大義。義舉而例亦因之俱舉。文章家旣讀潘王之書。卽何可不進以此著也。楚楨爲端臨先生從子。少與儀徵劉孟瞻齊名。號揚州二劉。作令畿南。迭更盤錯。時遣人持券告貸京師。而一錢不以累民。比官元氏。貧愈甚。循聲亦愈起。訪獲縣境古碑甚多。其尤著者。則延熹封龍山碑。自來金石家。皆未見也。靈石楊君墨林。及弟子言。雅好金石。讀君書。喜且寶之。因請刻入連筠籒叢書中。而以校勘之事屬余。余旣獲交孟瞻。又獲交楚楨。故樂序行其書。楚楨又著有寶應圖經。精博與孟瞻揚州水道記。埒二劉之目。豈虛譽哉。道光二十九年三月初六日。平定張穆序。

漢石例敘

元潘景梁、明王止仲、國朝黃太沖，並纂錄韓柳諸家文，爲碑碣例。世稱金石三例是也。夫刻石之興，肇自皇古。梁甫、弇山，載籍蓋闕。琅邪、碣石，巡幸偶經。降至東都，斯風乃熾。公卿貴人，下及一行之士，門生故吏，載筆貞珉。其書爵里姓名爲傳體，其書生卒年月爲狀體。魏晉以降，迄於唐初，謹守其法。韓柳上法莊荀，工於思議，而體製寢失。余素喜東漢碑碣之文，甄而錄之，爲墓碑例百五十，廟碑例二十九，德政碑例十。三墓闕例十一，雜例三十二，總例四十八，爲文之體，略備於斯。魏晉以下，概從闕如。然而祖考稱考，

郡據史張

元祠
堂碑 祖母稱母 金廣延
紀母碑

爾雅父之考爲王考，父之妣爲王母。漢人省文去王字，故曰考曰母，然不可爲例。又案歐陽氏博古圖，商父癸鼎持刀，父癸尊執戈，父癸卣持干，父癸卣執戈，父癸盃並上作孫字形，下注父癸二字。商父乙尊，父乙第二爵，並上作孫字，下注父乙二字。上孫字應指作器之人，下父癸父乙應指祖父，似孫得稱祖爲父。又商母乙鬲，亞形中孫執戟，旁注母乙二字，似孫得稱祖母爲母。案周州卣提梁銘一字曰

孫圖說云、孫可以爲王父尸。然則古器凡篆作孫字如人立形皆指尸。下文父癸父乙母乙卽指上尸。言子稱父母非孫稱祖父母也。又案薛氏鐘鼎款識齊侯罇鐘云用享于其皇祖皇妣皇母皇考似祖母稱妣蓋本毛詩似續妣祖周禮以享先妣之義然下有母考則上文祖妣之妣自是祖母之稱若單用妣字其義不明矣。

父母生稱考妣

冀州從事
郭君碑

爾雅父爲考母爲妣方言南楚瀑沅之間謂婦妣曰母嫛稱婦考曰父嫛郭氏注爾雅云禮記曰生日父母妻死曰考妣嬪今世學者從之案尙書曰大傷厥考心事厥考厥長聰聽祖考之彝訓如喪考妣公羊傳曰惠公者何隱之考也仲子者何桓之母也蒼頡篇曰考妣延年明此非死生之異稱矣又注方言云古者通以考妣爲生存之稱據郭氏兩注是考妣爲存歿通稱曲禮孔疏云此生生死異稱出爾雅文言其別於生時耳若通而言之亦通也下文引尙書云卽用郭氏爾雅注文是孔氏亦以考妣爲存歿之通稱案生死異稱乃曲禮文非爾雅文孔氏誤也說文考老也妣歿母也考老互訓乃本義引伸爲歿父之稱許不言者妣爲歿母則考爲歿父從可知也釋名父死曰考考成也亦言稿也稿於義爲成凡五材膠漆陶冶皮革乾稿乃成也母死曰妣妣比也比之於父亦然也據許劉二說則考妣

定爲父母既歿之稱。今從之。

以及烈祖 太尉楊公碑 烈考 太尉橋公廟碑 文考 文範先生陳仲弓碑 之號。

此俱襲用詩書之文。然今人宜避。

親父 元儒先生 裴壽碑 惠兄順弟 北軍中候 郭仲奇碑 之名。或碑陰頌其舉主。 三公 山碑 或碑額題其姓名。 蒼讀 廟碑

碑末碑陰。後人題年月姓名。常例也。碑額題名則非。

尊之則頌以聖心。 襄州刺史 王純碑 卑之則比于下流。 太尉楊公碑

聖心下流。並指出錢立碑人。

此皆不可爲法。若夫張氏爲天文之應。 巴郡太守 張敏碑 柳氏爲柳宿之精。 孝廉柳敏碑 以霜月爲九月。以皇極爲五日。

魯相韓勅造 孔廟禮器碑

王氏懷祖漢隸拾遺。霜相古同聲。故霜字以相爲聲。錢氏大昕養新錄。霜月。相月也。爾雅。七月爲相。恐非漢人立文本意。

歐陽趙洪並多詆斥。又如祖考稱皇。

淳于長夏承碑

曲禮祭王父曰皇祖考。王母曰皇祖妣。父曰皇考。母曰皇妣。夫曰皇辟。注更設稱號。尊神異於人也。皇君也。祭法皇考廟。注亦云。皇君也。正義皇考廟者。曾祖也。皇大也。君也。曾祖轉尊。又加大君之稱也。案此則自曾祖至考及妻稱夫。皆得爲皇。周制也。陔餘叢考曰。皇者大也。於君上之義無涉。曲禮父曰皇考。母曰皇妣。離騷朕皇考曰伯庸。晉司馬機爲燕王告祔廟文。亦曰敢昭告於皇考清惠亭侯。是也。徐氏讀禮通考。謂今人以顯考爲父。起於元世。時以皇字爲君上尊稱。遂易爲顯考。然葉石林云。漢議宣帝父稱羣臣。初請諡爲悼太子。魏相以爲宜尊稱曰皇考。自是皇考遂爲尊號之稱。非後世所得通用。石林之言如此。則似宋時已無稱父爲皇考之例。

女子稱妃。

先生郭輔碑

碑云。娥娥三妃。行追太姬。以三妃稱郭氏三女。案檀弓。舜葬於蒼梧之野。蓋三妃未之從也。碑文本此。鄭氏注云。帝嚳而立四妃矣。象后妃四星。其一明者爲正妃。餘三小者爲次妃。帝堯因焉。至舜不告而取。不立正妃。但三妃而已。夏后氏增以三三而九。合十二人。春秋說云。天子取十二。卽夏制也。以虞夏及周制差之。則般人又增以三九二十七。合三十九人。周人上法帝嚳。立正妃。又三二十七爲八十一。

人以增之。合百二十一人。其位后也。夫人也。嬪也。世婦也。女御也。考爾雅釋詁。妃。合也。說文 妃。匹也。妃。

對也。妃。嬪也。左氏桓二年傳。嘉耦曰妃。然則妃者上下皆得稱之。無貴賤一也。鄭君注檀弓。推周之制。天子妃一百二十一人。則后。夫人。嬪。世婦。女御。皆得爲妃。明尊卑之稱。不繫此也。曲禮云。天子有后。有夫人。又云。天子之妃曰后。諸侯曰夫人。大夫曰孺人。士曰婦人。庶人曰妻。不言天子有妃。不言天子之妃曰妃者。知妃非后專稱也。諸侯大夫士庶人不稱妃者。承上文而辭省也。左傳。惠公元妃孟子。文十四年傳。子叔姬妃齊昭公。昭八年傳。陳哀公元妃生悼太子。偃師。二妃生公子留。下妃生公子勝。後漢書皇后紀。晉獻升戎女爲元妃。則夫人稱妃。儀禮少牢饋食禮。諸侯卿大夫祭其祖禰於廟之禮也。康成 而云以某妃配某氏。則孺人稱妃。左氏成八年傳。士之二三。猶喪妃耦。此士統庶人言。則婦人與妻稱妃也。秦漢以後。猶稱諸侯王妃。至大夫士不稱妃。蓋此稱鮮用而其義始尊矣。此今人所宜避也。又碑紀郭輔而稱其女爲妃。修辭未善。若夫以太姬比諸女。洪氏隸釋已斥其非。不更贅言。

郡署稱朝。

司隸從事郭究碑。豫州從事尹宙碑。

顧氏亭林日知錄。據後漢書劉寵傳。晉書劉琨傳。三國志孫皓傳注。晉盧湛贈劉琨詩。謂郡守稱朝。據潘岳西征賦。謂縣令稱朝。又引胡三省通鑑注。晉宋之間。郡曰郡朝。府曰府朝。藩王曰藩朝。宋武帝爲

宋王齊高帝爲齊王時曰霸朝。然非後世所可通用。又案郭究尹宙二碑皆稱本朝。此猶撰文人稱之。非太守自稱。後漢書法真傳太守曰欲以功曹相屈。光贊本朝。太守自稱本朝。後世斷不可行。

官牒稱勅。

帝堯碑。史晨饗孔廟後碑。西嶽華山廟碑。仙人唐公房碑。武都太守李翁西狹頌。

勅本作敕。漢碑多作勅。其實勅音徠。不當借用。顧氏亭林金石文字記據陳咸傳及孫寶何竝之文。又據韋賢丙吉趙廣漢韓延壽王尊朱博龔遂諸傳謂漢時官長行之掾屬祖父行之子孫皆曰勅。又據何曾傳謂晉時上下通稱。至南北朝惟朝廷專之。而臣下不敢用。故北齊樂陵王百年習書數勅字。遂以見殺。趙氏翼陔餘叢考又據漢書成帝元帝詔王尊丙吉傳後漢書陳寵傳魏略梁習三國志高堂隆司馬昭張猛諸人證長官勅僚屬。據漢書韋賢後漢書張純逸民傳向子平魏略曹操李豐吳書李衡世語薛夏北史雷紹崔光諸人證尊長勅子弟。又言北齊王百年作勅字。武成帝殺之。又似專爲君上之用。蓋古時詔敕本自朝廷。而民間口語相沿。亦得通用。至唐顯慶中再定制。必經鳳閣鸞臺始名爲敕。而其令始嚴。然唐書安祿山討契丹。敕人持一繩。李愬嫡母卒。父晟敕慙服。則臣下猶有用勅字者。此修書者習用古文之字以爲文。非當日實事也。案漢代勅字上下通用。魏晉以後此字漸尊。今仍以漢言之。顧趙所引證外。後漢寇恂岑彭耿弇劉隆魯恭郭丹鮑永梁統曹褒張霸度尙班超橋

元、楊震、孔融、黃昌、范式諸傳所載，皆長官敕僚屬也。胡廣、周榮、楊由諸傳，崔駰傳注，引華嶠書所載，皆尊長敕卑幼於平日也。漢龔勝、後漢羊續、樊宏、鄭宏、梁統、張霸、丁鴻、趙咨、張酺、盧植、趙岐、任末、范丹、謝夷吾諸傳，列女傳袁安、李固傳注所載，皆尊長敕卑幼於臨終也。蓋遺命亦得稱敕，然在後世，俱不可行。又案薛氏鐘鼎款識，諸旅鬲云：諸旅作尊鬲，其子孫永寶用敕。此亦祖父敕子孫，在周時敕字通用。秦漢猶然，然不可爲後世法。

墓域稱陵。

北海相景君碑，丹陽太守郭閔碑。

日知錄據史記趙世家、秦本紀爲稱陵之始。據水經注引風俗通後漢書明章二帝紀、西京雜記及曹公祭橋元文、陳思王上書謂人臣得稱陵。又據舊唐書德肇傳、盧粲駁武承訓造陵之奏謂陵之稱施於尊極，不屬王公已下。此自南北朝以後然爾。審是則人臣不得稱陵，由來已久。案水經注、澠水篇云：澠水又東逕京邱北，南對漢中山頃王陵，北對君子岸，岸上有哀王子憲王陵。澠水又東逕白土北，南即靖王子康王陵。又東逕漢哀王陵，冢有二墳，故世謂之兩女陵，非也。灑水篇云：灑水又東逕燕王陵南。此漢代人臣得稱陵也。濟水一云：又東逕秦相魏冢南，世謂之安平陵。此戰國時人臣得稱陵也。河水四云：其水東南逕子夏陵北，汾水篇云：襄陵縣西北有晉襄公陵。顏師古注漢書地理志亦

以河東郡襄陵爲晉襄公之陵。陳留郡襄邑本承匡襄陵鄉也。宋襄公所葬。此春秋時諸侯及大夫士皆得稱陵。河水四引闕駟十三州志曰。雷首山南有古冢。陵柏蔚然。俗謂之夷齊墓。似商周之際。已通名陵。顧氏謂始於趙秦恐非。

以病亟爲不豫。

斥彰
長碑

書金縢。王有疾。弗豫。孫氏星衍注曰。史遷弗作不豫。一作愈。疏曰。曲禮疏引白虎通曰。天子病曰不豫。言不復豫政也。今本白虎通脫文。史公爲不豫者。書序。武王有疾。釋文云。馬本作有疾不豫。論衡死僞篇。後漢禮儀志。皆引作不豫。與史公同也。豫。說文作愈。云喜也。引此經。釋文云。豫本又作杼。案杼非古字。豫愈文異義同。不豫者。言有疾不適意也。非不復豫政之謂。此旣爲天子病之名。後人所宜避也。逸周書祭公解。王若曰。祖祭公。我聞祖不豫有加。此在人主稱臣下則可。且祭公於穆王在祖列。故隆稱爲祖。遂以天子病之名稱之。若人臣自稱則僭也。不豫與不懌同。顧命。王不懌。釋文。馬本作不釋。曰疾不解也。馬氏是別一義。律麻志引顧命曰。王有疾不豫。然則今文亦作不豫也。

以終命爲徂落。

祝長嚴
新碑

堯典。帝乃徂落。孟子引作放勳。乃徂落。說文作殂。云殂往死也。虞書曰。勳乃徂。爾雅。徂落。死也。據此諸

文則徂落乃死之通稱。徂殂通用。然書以紀帝堯。後人自不必作泛稱矣。

以遺言爲顧命。

陳太邱碑。司空臨晉侯楊公碑。朱公叔墳前。石碑。處士國叔則銘。議郎胡公夫人哀讚。

臣以遺言告君。君以遺言告臣。古人皆稱顧命。禮記緇衣。葉公之顧命曰。毋以小謀敗大作。毋以嬖御人疾莊后。毋以嬖御士疾莊士大夫卿士。逸周書祭公解。祭公告穆王曰。謀父疾維不瘳。朕身尙在茲。朕魂在於天。又曰。汝無以嬖御固莊后云云。與緇衣大同小異。則知緇衣之葉公。乃祭公之訛。或葉公述祭公之言。記禮者文不備耳。此臣告其君也。書顧命篇。此君告其臣也。緇衣鄭注。臨死遺書曰顧命。顧命僞孔傳。臨終之命曰顧命。正義說文云。顧。還視也。鄭元云。回首曰顧。顧是將去之意。言臨將死去。回顧而爲語也。漢代人臣病亟。遺命戒其子孫。亦稱顧命。後漢書趙咨傳。迺遺書敕子允。子允不忍。父體與土并合。欲更改殯。祇建誓以顧命。於是奉行。崔駰傳。瑗臨終顧命子寔曰。歸精於天。還骨於地。何地不可藏形骸。勿歸鄉里是也。此則顧命二字。爲古人上下之通稱。然在今人亦宜避。

以居喪爲諒闇。

北海相景君銘並陰

書無逸云。乃或亮陰三年不言。伏生大傳作梁闇。禮記喪服四制作諒闇。論語作諒陰。公羊文九年注。引論語作涼闇。玉篇涼。俗涼字。漢書五行志作涼陰。伏生大傳。書曰。高宗梁闇三年不言。何爲梁闇也。傳曰。高

宗居凶廬三年不言。此之謂梁闈。鄭注：闈讀如鷦鷯，謂廬也。其注禮記及論語義同。左氏隱元年疏引馬氏注：亮，信也。陰，默也。爲聽於冢宰，信默而不言。僞孔傳論語孔注義同。案鄭氏是也。爾雅釋宮：楣謂之梁。喪服傳：居倚廬，寢苦枕塊。旣廬，翦屏柱楣。注云：柱楣所謂梁闈。大傳：父母之喪，居倚廬不塗，寢苦枕塊，非喪事不言。君爲廬宮之旣葬，柱楣塗廬，不於顯者。君大夫士皆宮之旣練，居聖室，白虎通喪服篇：倚廬於中門外東牆下，戶北面。潘安仁西征賦：天子寢於諒闈，然則倚廬爲始遭喪時所居。柱楣爲旣葬後所居也。梁本字，亮諒涼皆假借字。闈本字，廣雅釋宮：庵，舍也。王氏懷祖疏證云：喪服四制，鄭注云：闈，謂廬也。義與庵同是也。作陰者，取陰闈之義，亦假借也。許君宗寅曰：文選潘安仁閒居賦：今天子諒闈之際，李善注：謂凶廬裏寒涼幽闈之處。故曰諒闈。其說與鄭氏異。要皆指凶廬言也。此制上下同之。故漢晉書通用諒闈二字。後漢書章帝八王傳：濟北惠王壽，諒闈以來二十八日。晉書山濤傳：濤遭母喪，詔曰：山太常尙居諒闈，然則諸王及人臣皆得稱諒闈也。景君銘稱諒闈，義蓋取此。然經傳旣以稱高宗居喪，則亦後人所宜避也。碑又有單稱闈者。隸釋衛尉衡方碑：寢闈苦由是也。旣避諒闈，亦不必單用闈字。

揆以今儀，皆宜諱避。至於橋元碑陰，刊以鼎鉞之文。漢石畫象，不止武梁，但武梁畫象最多爾。

太尉橋公廟碑

武氏石室廣繪聖賢之象

武梁祠堂畫象

山陽麟鳳。

麒麟鳳
皇碑

黽池木禾。

李翁黽池
五瑞碑

並徵作繪之功。無關摛詞之義。凡斯之類。概不入編。於是刊其蹊駁。

采厥精腴。繩墨定而曲直明。規榘陳而方圓正。洵藝林之表臬。而文苑之楷模也。爰爲條列例目。將以就正大雅。得所折衷焉。道光十年十一月。寶應劉寶楠敍於江都寓宅之愈愚齋。

漢石例目錄

卷一

墓碑例

稱碑例

稱碣例

稱銘例

稱表例

稱頌例

稱靈表例

稱哀讚例

稱神誥例

稱神道碑銘例

碑額書國號書官書姓稱君例

碑額書先世例

碑額書前官例

碑額標郡邑名例

碑額稱公例

碑額稱侯例

碑額稱府君例

碑額稱處士例

碑額稱先生例

碑額稱故民例

碑額標諡例

碑額標私諡稱先生而繫以字例

碑無額自標題其首行例

碑有額復自標題其首行例

碑文首用維兮例

碑文首用伊歎例

碑敍首以官爵冠姓氏上例

碑敍首書卒葬年月日及立碑人例

碑敍首書立碑年月日敍末書卒年月日及立碑人例

碑文稱公例

碑文稱君例

碑文稱府君例

碑文稱明府例

碑文稱使君例

碑文稱先生例

碑文稱徵士例

碑文稱處士例

碑文稱官例

碑文稱字例

碑文載私諡例

碑額書姓碑文不復書姓但書名字郡邑例

碑額書姓碑文復書姓例

墓在故里碑文但書名字不書郡邑例

卷二

墓碑例

碑文渾書先世高曾祖父不名例

先敘遠祖後敘近代俱不名例

先敘遠祖後敘近代遠祖名近代不名例

先敘近代後敘遠祖俱不名例

先敘近代後敘遠祖近代不名遠祖名例

先敘近代旁及伯叔兄弟子姓俱不名後敘遠祖名例

敘遠祖不敘近代遠祖名例

敘遠祖不敘近代遠祖不名例

詳敘先世功德書名例

詳敘先世功德不書名例

詳書先世功德旁及伯叔兄弟功德例

書天潢先世例

書國戚先世例

一人立二碑皆書名字邑里世系例

一人立二碑一敘名字近代及遠祖一敘名字近代不及遠祖例

一人立二碑皆書遠祖不書近代一載名字里一不載名字里例

一人立二碑皆書名字及遠祖近代一書近代名一不書近代名例

一人立二碑一敘先世一不敘先世例

一人立三碑兩碑敘名字先世一碑不敘名字先世例

一人立三碑一略敘先世不載名字一詳敘名字邑里及先世一僅載名字例

書墓例

書卒例

書不祿例

書終例

書不瘳例

書丁憂例

書告病例

書歷年及卒年月日例

書卒年月日及歷年閒以事蹟例

書歷年及卒葬年月日例

渾書歷年例

渾書卒年例

渾書卒例

書在官病卒例

書致仕病卒例

書歸葬例

書不歸葬例

書合葬例

書不合葬例

碑中兼敘妻德及卒年例

碑末附載妻卒年月日例

婦人墓碑書氏書字例

書繼室例

有官職者妻得統稱夫人例

敘婦人家世例

書子孫官爵例

書弟及子官爵事蹟例

書孤嗣例

書哀子例

書無子例

公卿大夫爲卑官處士立碑例

邑長爲邑人立碑例

父母爲子立碑例

僚友立碑例

姻戚立碑例

子立父碑例

子立母碑例

孫立祖碑例

女立父碑例

女立母碑例

弟立兄碑例

弟及子同立碑例

子吏門人同立碑例

門生爲師之祖父立碑例

門人爲師之子弟立碑例

父子同塋立碑例

兄弟同塋立碑例

婦祔姑墓例

孫祔祖墓例

碑敍首總敍立碑人例

碑中敍立碑人爵里姓名例

碑中渾敍立碑人碑陰詳載姓名例

碑中渾敍立碑人碑末夾注姓名例

碑中敍首立碑人碑陰敍同立碑人復書首立碑人例

碑陰載立碑人姓名同郡不書郡同縣不書縣例

碑陰人名後各總標郡縣名例

卷三

墓碑例

書故吏故民例

書門生門童弟子不同例

書處士與德行好學不同例

書清白士與聘士不同例

義士及弟子統名諸生服義例

書分子例

分書奔喪持服例

分書某代門生例

碑文自標撰文人姓名例

碑文首書撰文人姓名碑末書立碑人姓名又系以詩詩後又列同立碑人姓名例

碑文渾書撰文人碑陰詳列立碑人末作四言詩敘故吏持服行喪之事例

碑文中敘詔册例

碑文中敘贈卹例

碑文中敍哀誄例

碑文但錄詔冊不復撰文例

碑末或陰附錄詔冊例

碑末補書先世例

碑末附載他人例

有誌無銘例

有銘無誌例

誌文接入銘詞不標詞曰銘曰等字例

自作誌銘例

生題石槨例

歿題石槨例

生壙碑末夾注年歲及其子名爵工師姓名例

墓碑中兼敍他石畫象及雕畫工人例

祔葬穿中石柱題詞例

石室題詞例

石人刊字例

石獸刊字例

記冢地例

冢地書向例

卷四

廟碑例

碑額稱廟例

碑額稱神祠例

碑額稱祠堂例

碑額載郡邑名字例

嶽廟石闕題詞例

神廟石闕題詞例

廟門題額例

廟門書先世官系及政蹟例

碑敍首書修廟年月日及修廟人爵里姓名字例

碑敍首書謁廟人爵里姓名字及年月日例

碑敍首書修廟祭廟人爵里姓名字碑中書同修廟人爵里姓名字碑末書助修廟人世系德業並繫以吉語例

碑文詳書修廟人立廟碑人爵里姓名字例

碑中書修廟人爵里姓不書名字碑末補書名字及子弟名字同修人名字例

碑中書立廟人爵姓名同立廟人爵里姓名碑末又詳載同立廟人爵里姓名字例

碑中書修廟立碑人爵里姓名字碑末書同修廟立碑人爵里姓名字例

碑中書立廟立碑人爵里姓名字碑末書立碑年月日碑陰又詳書立碑人及年月日例

碑中書立廟人碑末書祭廟人例

碑中書立壇刊碑人年月爵里姓名碑末書前致祭人爵里姓名字今監立碑致祭人年月爵里姓名及同監立碑人例

碑中書祀廟人姓名碑末又稱頌祀廟人碑陰載出錢立碑人姓名碑側又詳載立碑人例

碑中書制器人爵里姓碑末補書名字及出錢人爵里姓名字碑陰又廣載出錢人爵里姓名字例

前官修廟後官立碑詳書修廟立碑年月及前後官爵里姓例

前官立碑未成後官成之詳書前後立碑年月日及前後官爵里姓名字例

碑文全錄狀牒末用讚銘載立碑人爵里姓名字及立吏舍人例

碑文全錄狀牒末用讚銘載立碑人爵里姓名字及立碑年月日與工師姓名例

碑文敍子孫官爵及立廟立碑之由例

碑文末補書名字總書歷官及卒葬年月日例

碑陰詳列世次例

碑陰條列價直例

碑陰分書治黃屋作碑出錢人爵姓名字例

德政碑例

額稱循吏例

額兼二職例

稱功德敍例

稱功勳銘例

稱清德頌例

生稱諱例

生稱諱例

碑中書立碑年月立碑人爵里姓名字碑陰又詳載立碑人爵里姓名字及工師里姓名字例

碑中書立碑人姓名碑陰又詳列立碑姓名其碑中所書立碑人惟一人重書餘不重書碑陰未書

年月日又繫以吉語例

碑中詳書先世名爵功烈碑末書年月日及立碑人姓名繫以吉語碑陰又詳載立碑人姓名例

碑中既詳載立碑人碑末書年月日又於立碑人中序其世系學業功德作詩稱美例

碑文全錄令牒例

碑末續書官階仕蹟附載詔書例

墓闕例

稱先靈例

稱神道例

書爵姓例

書爵省文例

詳書世系略載宦績例

書卒葬年月日例

書立闕年月日及子弟建闕人石工人例

書弟姪官爵學行例

兩闕一書姓名里一書官爵例

兩闕分書官爵一書姓及立闕年月日一不書例

兩闕分書官爵一書姓名字一書姓例

卷五

雜例

表界域例

表鄉聚例

表宮殿例

表陂池例

爲宮殿立碑敍立碑人爵里姓名例

爲古墓立碑敍立碑人爵里姓名例

書修學校年月工程例

書修祠宇年月工程例

書修堤堰爵里姓名年月工程例

書修橋梁爵里姓名年月工程例

首書倡修堤堰人次及繼修人末復書倡修繼修同修及作銘人例

首書倡修橋梁人其同修者碑文三見末及義工義徒例

書修門闕爵里姓名年月工程例

書修道路爵里姓名年月工程例

書修道路爵里姓名及立碑人爵里姓名例

書修道路爵里姓名渾書立碑人不載爵里姓名例

碑首書表字末書記字例

碑首用維字末用主字例

書家產例

書宅舍例

表孝行例

表軍功例

舊有立石今始刊詞揭於碑陰例

舊碑已壞改刊新石仍用舊文例

舊碑已壞改刊新石不用舊文例

兩人共立一碑例

一碑載兩人碑詞例

一碑載兩事例

神位祚几刻石例

神位柩椁刻石例

墳壇石例

廟壇石例

卷六

總例

碑文隔圈例

碑文空字例

碑文出格例

碑文提行例

碑文空行例

碑文低行例

重字旁注二字例

重字旁注二點例

銘詞稱詞例

銘詞稱銘例

銘詞稱誅例

銘詞稱歎例

銘詞稱頌例

銘詞稱讚例

銘詞稱敍例

銘用三言例

銘用六言例

銘用七言例

銘用長短句例

銘詞分章例

銘後書亂曰例

銘後書重曰例

銘後書敍曰例

國號上加大字例

國號上加皇字例

國號上加聖字例

國號上加神字例

書四時天名例

書太歲例

書倉龍例

書星次例

書月律例

書朔例

書閏例

書卅書卅書卅等字例

碑末書立碑年月朔日太歲例

碑末書立碑人爵里姓名字及年月日例

碑末碑陰書立碑人姓字不書名例

碑末書撰文寫碑刻碑人姓名例

碑末書市石察書刻碑人姓名例

碑文左旋例

碑文橫書例

碑陰有額例

碑陰標目例

碑陰書立碑人錢數例

碑陰書立碑出錢人子弟統於父兄例

碑末既書出錢人姓名復於出錢人中稱美其好義樂輸者例

碑陰末稱美工師例

近見錢唐梁君玉繩誌銘廣例。吳江郭君磨金石例補。採集漢魏六朝碑文。其塗則廣。其例甚略。又嘉興馮君登府金石綜例。上採商周。下及唐宋。旁及海東諸國。其例較梁郭差備。而疏略仍多。且漢碑已有之例。而引六朝唐碑。如稱父爲君。已見樊安碑。而引唐顏氏家廟碑。銘詞分章。已見張公神碑。劉熊碑。而引唐木澗魏夫人祠碑。銘有銘不加銘。已見太尉楊公碑。陳留太守胡公碑。而引北魏司馬元興墓志。序三代書爵不書名。亦見楊公胡公碑。而引東魏司馬昇墓志。銘。

注。自

助於漢景
君闕銘

若斯之類。殊失檢校。又以稱曾祖爲高祖。爲曾父。稱高祖爲高門。稱曾祖爲曾門。稱他人
父爲先父。及生稱考妣爲例。今人臨文。未可襲用。夫金石之學。藉以考證經史。梁郭無所詮釋。馮
君亦未發明。均未善也。三書已刊行。閱者自能辨之。道光十六年三月下旬。寶楠自校一過。漫識
於目錄後。時寓都中揚州新館之淮海堂。

漢石例卷一

清 寶應劉寶楠錄

墓碑例

稱碑例

漢故國三老袁君碑 集古錄

歐陽氏集古錄、趙氏金石錄、洪氏隸釋、隸續所載諸墓碑，惟此碑順帝時立。

歐趙洪三家並載碑文云：永建六年二月卒，是此碑順帝時立。袁君

名良，通志金石略三老袁貢碑，自注永建六年貢其良之誤，與水經渠水篇注作袁梁音相通也。又案袁安祖父名良，見後漢書本傳，在此袁良前。

年代較先，舉以示例。餘不備錄。按禮碑

制有二：一爲宮廟庠序中庭之碑，以石爲之；一爲下棺之碑，以木爲之。聘禮，賓入門三揖，鄭注：入門將曲揖，既曲北面又揖。當碑揖，又賓自碑內聽命，又賓降自碑內祭義，君牽牲，既入廟門，麗於碑。鄭注：麗，繫也。謂牲入廟，繫著中庭碑也。雜記：宰夫北面於碑南，東上。公食大夫禮，入陳鼎於碑南。此諸侯廟內

之碑也。諸侯廟有碑。則天子廟亦有碑。聘禮。陪鼎上當碑南。陳注。宮必有碑。所以識日景引陰陽也。凡碑引物者。宮廟則麗牲焉。以取毛血。其材宮廟以石。窆用木。又醯醢百甕夾碑。疏。碑近北東當洗。案聘禮。卿館於大夫。大夫館於士。謂館於大夫士之廟。則此所云碑者。賓館之碑。卽大夫士廟之碑。公食大夫禮。庶羞陳於碑內。庭實陳於碑外。亦指賓館。士冠禮。至於廟門揖入。三揖至於階。士昏禮同。此大夫士廟之碑也。據鄭注云。宮必有碑。則天子諸侯燕寢亦常有碑。賈公彥云。雖無文。兩君相朝。燕在寢。豈不三揖乎。明亦當有碑矣。其說是也。又鄉飲酒禮。三揖至於階。注。將進揖。當陳揖。當碑揖。諸侯燕禮賓揖當與此同。鄉

射記。主人以賓三揖及階。則諸侯鄉庠庭中有碑也。賈公彥謂天子庠序有碑。此以意推之。亦當然也。

宮廟之碑。皆在中庭。而文心雕龍云。宗廟有碑。樹之兩楹。事正麗牲。案正當作止。未勒勳績。玉海亦謂碑樹

兩楹。按兩楹不得有碑。此說誤也。是皆指中庭之碑言也。檀弓。公室視豐碑。三家視桓楹。鄭注。豐碑斲大木爲之。形如石碑。於椁前後四角樹之。穿中於閒爲鹿盧。下棺以絆繞。天子六絆。四碑。前後各重鹿盧也。四植謂之桓。諸侯四絆。二碑。碑如桓矣。大夫二絆。二碑。士二絆。無碑。按喪大記。君葬用輅。四絆。二碑。大夫葬用輅。二絆。二碑。士二絆。無碑。此鄭注所本。喪大記又云。凡封用絆。去碑負引。鄭注。樹碑於壙之前後。以紼繞碑閒之鹿盧。輓棺而下之。此時棺下窆。使輓者皆繫紼而繞。要負引。舒縱之。備失脫也。

用緋去碑者。謂縱下之時也。劉熙釋名。碑者被也。此本葬時所設也。

孫氏星衍北堂書鈔。景宋本跋此書所引經典。如引釋名碑者披也。本葬時所設也。今本

葬作王莽。足證古本書傳與流傳本不同。今依據改。恭冕曰。廣韻碑字注引釋名云。本葬時所設。尤爲確證。而顧氏金石文字記。據誤本釋名駁難。不知釋名古本固不誤也。

施轆轤以繩被其上。引以下棺也。

臣子追述君父之功美。

廣韻引無美字

以書其上。後人因焉。故建於道陌之頭。顯見之處。名其文就謂之碑也。

是皆指下棺之碑言也。潘氏昂霄金石例。引韻會舉要。碑字注云。說文。豎石紀功德。從石卑聲。徐曰。案古宗廟之碑以繫牲耳。後人因於其上。紀功德。此碑字從石。秦以來制也。七十二家封禪。勒石不言碑。穆天子傳。乃爲名迹於弇茲石上。亦不言碑。案今本說文。無紀功德三字。不知韻會所據何本。碑字從石。見儀禮禮記。不得云秦制。但經傳所云碑在宮廟。則以石。下棺則以木。此爲異耳。其名碑則一也。紀功德亦以石。但不名碑。故史記封禪書。引管子。秦始皇本紀。並云刻石。不言立碑。淮南子。盧敖見若士。遯逃乎碑。高誘注。匿於碑陰。此見於西漢人書也。然則墓用石名碑。與刻石紀功德名碑。皆始於漢。而文心雕龍謂碑者。埤也。上古帝皇。紀號封禪。樹石埤岳。故曰碑也。周穆王紀迹于弇山之石。亦古碑之意。此謂碑名肇自上古。其說恐非。隸續曰。碑之有穿。在廟則以繫牲。在穴則以下柩。又曰。漢碑穿無不居中。楊統碑後有餘石。打碑者去之。非穿之偏也。金石文字記曰。郎中鄭固碑。有一大孔。漢碑多如此。

孫何碑解云、何始寓家於穎、嘗適穎、見荀陳古碑數四、皆穴其上、若貫索之爲者、問故起居郎張公觀、公曰、此無足異也、蓋漢去聖未遠、猶有古豐碑之象耳、後之碑則不然矣、予見漢碑、皆高不過今之三尺餘、可用以麗牲、以木爲之、可用以引棺、今既失其穿中之制、而碑之高下、乃無限度、與古人之碑、名同而體異也。

趙氏陔餘叢考曰、碑有序有銘、謂之碑文可也、而直謂之碑、則非也、孫何曰、蔡邕撰郭有道陳太邱碑、皆有序冠篇、而未亂之以銘、未嘗直名之曰碑、迨李翱爲高愍女碑、羅隱爲三叔碑、梅先生碑、則序與銘混、而不分其目、亦不復曰文而直曰碑、是竟以麗牲懸緯之具、而名其文矣、古者嘉量有銘、謂之量、鐘有銘、謂之鐘、銘、鼎有銘、謂之鼎、銘、不聞其去銘字、而直謂之量也、鐘也、鼎也、此名目之宜審者也、自注、南史虞荔傳、梁武於城西置士林館、荔乃制碑奏上帝、卽命勒于館、則六朝時已單名曰碑、案歐趙諸家所錄漢碑、其標目皆單稱碑、不稱碑文、又歐薛諸家所錄量鐘鼎、其標目亦單稱量稱鐘稱鼎、不稱量銘鐘銘鼎銘、趙氏所言殊非。

稱碣例

許君穿寅曰、周禮秋官、職金楊而璽之、注、今時之書、有所表識、謂之楊、又蜡氏、有死於道路者、令埋而置楊、漢書酷吏傳、塞寺門、桓東楊著其姓名、顏師古注、楊、杙也、椽杙於葬處、而書死者姓名也、說文、楊、楊、杙也、春秋傳曰、楊而書之、

廣雅、楊、杙也、廣韻、楊、杙、有所表識也、楊、漢人語、其字本从木、後

人以石爲之、因通用碣、案許說是也、碣、用木者、亦古碑用木之證。

孔德讓碣 集古錄

江原長進德碣

隸釋

隸釋曰：江原長碣似闕非闕，似碑非碑。隸續曰：孔謙碣甚小，一穿微偏，左有暈一重，起于穿中，復有兩暈在右，其一甚短，與它碑小異。金石例曰：五品以上立碑，螭首龜趺，七品以上立碣，圭首方趺。案此隋制，非漢制也。金石錄、隸釋並載故民吳公碑，童子逢盛碑，賤者幼者並稱碑。稱碑者，非以其官尊，則稱碣者，非以其官卑也。隸續碑圖：堂邑令費君碑，螭首。太尉陳司空宗公碑，圭首。

水經注：陰溝水篇載費亭侯曹騰碑亦圭首。

隸釋

闕三老袁良碑銘曰：才本惠

曜其碣，是碑碣通稱之證。

特碣較碑狹小而員。後漢書竇融傳：憲登燕然山刻石，令班固作銘曰：封神正

兮建隆碣。注：方者謂之碑，圓者謂之碣。碣，碣碣也是也。趙岐傳：年三十餘，有重疾，乃為遺令，勅兄子曰：可立一員石於吾墓前。又劉昭祭祀志注：引應劭漢官馬第伯封禪儀記曰：治石二枚，狀博平圓九尺，此

壇上石也。其一石武帝時石也。此員石皆碣也。昔人謂石鼓乃石碣。

碣形似鼓。遂誤名鼓。

蓋有見於此。

隸續碑圖云。江原長碑。其下一

獸銜環。其文三行。以左爲首。似亦是墓闕也。案此圖上狹下廣。誠如隸釋所云。似闕非闕。此復云亦是墓闕非也。又此圖碑首方平。無圭螭之文。豈漢制圭首螭首統名碑。首無圭螭名碣歟。

稱銘例

說文。名。自命也。从口夕。夕者。冥也。冥不相見。故目口自名。段氏玉裁注曰。祭統曰。銘者。自名也。此許所本。周禮小祝。故皆當作名。鄭君注經。乃釋銘爲刻。劉熙乃云。銘。名也。記名其功也。呂忱乃云。銘。題勒也。不用許說。

漢故中常侍長樂太僕吉成侯州君之銘

金石錄

漢揚州刺史敬君之銘

同上

碑稱銘。常例也。略舉趙氏書以見例。餘不備錄。按禮記大學。有湯盤銘。祭統。有孔悝鼎銘。大戴記踐阼。有武王几杖銘。左氏傳。有讒鼎銘。正考父鼎銘。銘。謂題勒也。穆天子傳。銘迹於縣圖之上。郭注。謂勒石。銘功德也。皆非施之於葬。古者葬用銘旌。不用銘石。士喪禮。爲銘各以其物。亡則以緇長半幅。經末長終幅。廣三寸。書銘于末。曰某氏某之柩。檀弓。銘。明旌也。以死者爲不可別已。故以其旗識之。

喪服小記。書銘自天子達。

於士其辭一也。男子稱名，婦人書姓。與伯仲如不知姓，則書氏。鄭注：此謂殷禮也。孔疏：書銘謂書亡人名字於旌旗也。天子書銘於大常，諸侯以下，則各書於旌旗也。

司常、王建大常，諸侯建旂，孤卿建旛。

大夫士建物，師都建旗，州里建旛，縣鄙建旂，皆畫其象焉。官府各象其事，州里各象其名，家各象其號。注：事名號者，徽號所以題別衆臣，樹之於位，朝各就焉。士喪禮曰：爲銘各以其物，此蓋其制也。案此則生以表朝位，謂之旌，歿以表柩，謂之銘旌。葬則埋入壙中，旣夕云：祝取銘置于茵，賈疏：茵入壙，銘亦入壙是也。兩漢以來，旣埋銘旌，復埋銘石。

呂氏春秋安死篇：今有人於此，爲石銘置之壘上，曰：此其中之物，具珠玉玩好財物寶器甚多，不可不拍拍之，必大富。世乘車食肉，人必相與笑之，以爲大惑。據

此文則銘石或豎立墓側，然此則寓言非定例。

其稱述功績，則取法鐘鼎，其詳書名氏，則取法銘旌。祭統曰：銘者，自名也。自名以稱揚其先祖之美，而明著之後世者也。又曰：銘者，論譏其先祖之有德善功烈勳勞慶賞聲名，列於天下，而酌之祭器，自成其名焉，以祀其先祖者也。法物銘其先績，墓石亦銘其先績，故銘墓亦稱銘。其制當始於秦漢，而傳記所載，季札之喪，孔子銘墓，衛靈之葬，石槨有銘，以及比干誌刻之盤，滕公定葬之石，後人僞託，皆無取焉。

陔餘叢考曰。墓誌銘之始。王阮亭池北偶談。謂事祖廣記引炙髀子。以爲始于王戎。馮鑑事始。以爲始于西漢杜子春。而高承事物紀原。以爲始于比干。槎上老舌。又引孔子之喪。公西赤志之。子張之喪。公明儀志之。以爲墓志之始。不知檀弓所謂志之者。猶今之主喪云爾。未可改作誌也。惟封氏見聞錄。青州古冢有石刻銘云。青州世子東海女郎賈昊。以爲東海王越之女。嫁荀晞之子者。又東都殖業坊王戎墓。有銘曰。晉司徒尙書令安豐侯王君墓。銘凡數百字。又魏侍中繆襲。葬父母墓。下題版文。則誌銘之作。納於壙中者。起於魏晉無疑云云。阮亭所據封氏之說固核。然南史齊武帝裴皇后薨。時議欲立石誌。王儉曰。石誌不出禮經。起自宋元嘉中顏延之爲王球石誌。素族無銘策。故以紀行。自爾以來。共相祖襲。今儲妃之重。既有哀策。不煩石誌。此則墓誌起於元嘉中之明據也。司馬溫公亦謂南朝始有銘誌埋墓之事。然賈昊辨識東海王越之女一事。亦見南史。則晉已有墓誌之例。又宋書何承天傳。文帝開元武湖。遇大冢。得一銅斗。帝以問羣臣。承天曰。此新莽時威斗。三公亡皆賜之葬。時三公居江左者。惟甄邯。此必邯墓也。俄而冢內更得一石。銘曰。大司徒甄邯之墓。又張華博物志。載西漢南宮殿內。有醇儒王史威長葬銘曰。明明哲士。知存知亡。崇隴原野。非寧非康。不封不樹。作靈垂光。厥銘何依。王史威長。則西漢時已有墓銘也。金史蔡珪傳。金海陵王欲展都城。有兩燕王墓。舊在東城外。俗傳燕王及太子丹之葬也。及啓壙。其東墓之樞端。題曰燕靈王舊。舊卽古樞字。漢高祖子劉建也。其西墓蓋燕

康王劉嘉之葬也。此又西漢題識於柩之法。不特此也。莊子云。衛靈公卜葬於沙邱。掘之得石槨。有銘曰。不憑其子。靈公乃奪而埋之。則春秋以前已有銘於墓中者矣。由此數事以觀。墓銘之來已久。王儉謂始自顏延之。此又何說。竊意古來銘墓。但書姓名官位。閒或銘數語於其上。而譔文敘事。臚述生平。則起於顏延之耳。又曰。碑刻以孔子題延陵吳季子十字碑爲始。或疑爲後人僞託者。唐李陽冰初工嶧山篆。後見此碑。遂變化開合。如龍如虎。則非後人所能造也。案叢考謂譔文敘事。起於顏延之。則歐陽趙洪諸家所錄漢人墓銘。又何說也。

近閱孫氏星衍孔子題吳季子墓字考云。孔子題字。見於唐大曆十四年。蕭定刻石。稱開元中。元宗敕殷仲容摸搨之。本文云。於虜有吳延陵君子之墓。又見汝閣

緯帖。字蹟縮小。文亦不同。然皆在此刻之後。余考春秋時。孔子未嘗至吳。而至齊觀贏博之葬。細釋蕃字當爲葬字。恐是孔子題季札子墓文。後人摹而刻諸吳地者也。藝文類聚載宋范泰吳季子札贊云。贏博遠死。解劍在生。夫子戾止。爰詔作名。是言孔子戾止在贏博。作名者。名字古不從金。此稱孔子題字之始。則晉宋人已盛傳之。碑文器字。汗簡引作縑音墓。云孔子題季子墓文。郭忠恕所見。亦是唐摹本。已與蕭定石刻不同。蓋碑文漫漶。傳摹者不能無舛耳。予案鞞實當爲勝。从古文。死在井閒。下省一巾。汗簡以肩爲石經死字。而葬作屬。知玉卽尸之誤。人卽尸下人也。則孔子所題。應是觀葬贏博時。書此文以歎美之。其爲先聖手蹟。非妄傳也。案孫說近理。附錄俟考。

稱表例

漢故謁者景君墓表

金石錄

說文、裘、上衣也。从衣从毛。古者衣裘以毛爲表。表本裘表之名。其後衣之有表者皆名表。

喪大記。袍必有表。論語。當暑。袷

絺。綌。必表而出之。

於是旌表亦名表。而墓石亦所以表揚功德。故亦名表。

釋名。下言於上曰表。思之於內。表思於外也。亦取表著之意。

後漢書李雲

傳、冀州刺史賈琮、過祠雲墓、刻石表之。延篤傳、爲平陽侯相、表龔遂之墓、立銘祭祠。范冉傳、刺史郡守各爲立碑表墓焉。此墓碑稱表之證。詳卷五碑首書表字注。

稱頌例

漢故成陽令唐君之頌 金石錄

此墓碑也。廟碑亦名頌。金石錄載漢桂陽太守周府君頌是也。不更見案頌本六詩之一。毛詩序云頌者、美盛德之形容。以其成功告於神明者也。鄭注周禮太師云、頌之言誦也。容也。誦今之德廣以美之。是則頌者、頌揚功德。被於樂章。非以刻石。史記秦始皇本紀、二十八年、始皇東行郡縣、上鄒嶧山立石、與魯諸儒生議刻石頌秦德。此作頌刻石之始。

下文之罘立石頌秦德。琅邪立石刻頌秦德。二十九年之罘刻石。三十二年刻碣石門。三十七年會稽立石刻頌秦德。皆仿於此。

兩

漢時、凡頌揚功德之文、皆得名頌。上下同之。若王褒聖主得賢臣頌、揚雄趙充國頌是也。

表揚處士亦得稱頌。後漢書法

真傳。友人郭正曰。法真可謂百世之師者矣。乃共刊石頌之。

表慕之文。亦所以頌揚功德。故亦得名頌。後漢書桓榮傳。彬卒於家。諸儒迺共樹碑而頌焉。崔駰傳。初寔父卒。起冢塋。立碑頌寔卒。大鴻臚袁隗。樹碑頌德。姜肱傳。熹平二年。終于家。弟子劉操。刊石頌之。韓韶傳。以病卒官。同郡李膺等。為立碑頌焉。是也。

稱靈表例

太傅胡公夫人靈表

蔡中郎集

司徒袁公夫人馬氏靈表

同上

靈之為善。常訓也。

書盤庚偽孔傳。詩定之。方中鄭箋。並云靈善也。

大戴禮曾子篇。神靈者。品物之本也。陽之精氣曰神。陰之精氣曰

靈。詩靈臺傳。神之精明者稱靈。

水經湘水注。聖人之神曰靈。

故漢書禮樂志。安世房中歌。靈凡再見。郊祀歌。練時日。靈

凡八見。天地一見。赤蛟五見。皆謂神靈也。說文云。靈。靈巫以玉事神。从玉。需聲。又云。靈。或从巫。案靈本事神之玉。因以名神。其事神之巫。亦因以名靈。王逸注楚詞。或云神。或云巫。隨文解之。其注雲中君云。楚人名巫為靈子。是巫名靈者。楚語則然。非正訓也。然則靈表者。

以兆域為神靈所依。故表其神靈。王稚子闕稱先靈是也。

見墓闕例

稱哀讚例

議郎胡公夫人哀讚 蔡中郎集

說文有贊無讚。則讚乃贊之俗字也。說文曰：贊見也。徐鉉曰：進也。執贊而進。有司贊相之。案事神接賓。

皆有贊幣者釋辭。故導引之辭。

經中擯相贊辭是稱述之辭。史中贊辭是

皆得名贊。釋名有讚無贊。釋言語篇云：讚、錄

也。省錄之也。釋典藝篇云：稱人之美曰讚。纂也。纂集其美而敘之也。文心雕龍云：讚者，明也。昔虞舜之祀，樂正重讚。蓋唱發之辭也。及益讚於禹，伊陟讚於巫咸，並颺言以明事，嗟歎以助辭也。此並以讚為贊正字。與許氏異。碑稱哀讚者，讚文皆代胡夫人之子述哀慟之辭故也。

稱神誥例

漢交趾都尉胡夫人黃氏神誥 蔡中郎集

周禮士師以五戒先後刑罰。二曰誥。用之於會同。注：大誥康誥之屬。是誥乃上告下之辭。說文：誥，告也。上告下，下告上，並得為誥。書序：湯歸自夏，至于大坰，仲虺作誥，以臣告君，是其例也。胡夫人留葬洛陽，不歸祔夫墓。碑文極言不祔葬之義，因名其碑為神誥。義取告神，與尋常墓碑不同。

稱神道碑銘例

漢故太尉楊公神道碑銘 集古錄

神道，卽羨道也。鄭氏注周禮冢人云：隧，羨道也。賈疏：天子有隧，諸侯以下有羨道。隧道上有負土，羨道上無負土。若然，隧與羨別。而鄭云隧，羨道者，對則異，散則通。案周制天子之墓道名隧。左氏僖二十五年傳：晉文公請隧，不許是也。

左氏隱元年傳：潁考叔曰：闕地及泉，隧而相見。鄭莊公曰：大隧之中，其樂也融融。莊姜曰：大隧之外，其樂也洩洩。此則故爲隧道，以實黃泉相見之言，非鄭莊敢用隧葬也。

秦制

天子之墓道名羨。史記秦始皇紀：或言工匠爲機藏，皆知之，藏重卽泄。大事畢已藏，閉中羨，下外羨門，盡閉工匠藏者，無復出者。正義：羨謂冢中神道是也。漢沿秦制，後漢書禮儀志云：大鴻臚設九賓，隨立陵南羨門道，東北面是也。

下文羨道凡四見

然則羨道改名神道者，避天子也。後漢書光武十王傳云：中山簡王

焉薨，詔大爲修冢塋，開神道。李賢注：墓前開道，建石柱以爲標，謂之神道是也。其與天子異者，天子神道在墓中，王侯以下神道卽指墓前地耳。陔餘叢考曰：吳曾能改齋漫錄謂墓路稱神道，自漢已然。而引襄陽耆舊傳：光武立蘇嶺祠，刻二石鹿夾神道。又楊震碑首題太尉楊公神道碑銘爲證。張謨又引漢書高惠文功臣表云：戚國侯李信成，坐爲太常丞相，侵神道爲隸臣。

據高祖功臣年表：信成坐縱丞相侵神道，在元狩五年。案建元以來侯者年表。

樂安侯李蔡。元狩五年。以丞相侵盜孝景園神道壻地罪。自殺國除。則信成所坐。卽李蔡也。天子神道本名美。此云孝景園神道者。上得兼下。故通稱也。

又霍光傳。光夫人侈大其瑩制。起三幽闕。

築神道。謂此二事又在前。是神道蓋起於西漢也。

碑額書國號書官書姓稱君例

漢故長水校尉曹君之碑

水經注陰溝水篇 下同

漢故幽州刺史朱君之碑

右碑額二錄之以見大凡。餘不詳載。其不書國號及故字者。豫州從事皇毓碑。不書國號者。故西戎令

范君之墓。不書故字者。漢謁者曹君之碑。

並見水經注夏水篇。漢代詔策章奏表記之文。敍人爵名者。並云故某官某人。存歿從同。歿稱故者。見馬援韋彪陰識劉般龔龔楊震張皓謝弼周舉左雄盧

植等傳。生稱故者。見伏湛廉范張霸班彪第五倫龐參劉陶謝弼蔡邕孟嘗謝該等傳。而鄭元傳應劭曰。故太山太守應仲遠。則自稱用故字。蓋故某官猶言前某官。原非物故之故。然在今日。則生者諱言故矣。

不書官者。漢故陳君

之碑。王氏起金石萃編

不專標最後官而詳書前職者。漢故綏民校尉騎都尉桂陽曲紅灌陽長熊君之碑。

金石錄

無漢故二字及不書官爵者。虞君之碑。

水經注陰溝水篇

孔君之墓。

金石錄

非例之正。故不錄。稱君之制。詳後碑文

稱君例。

案碑額皆陰文。金石文字記。引王宏撰曰。武榮碑額漢故執金吾丞武君之碑十字。作陽文凸起。他碑所無。附錄於此。不別爲例。

碑額書先世例

□本周末嗣馘氏襲以興勃海君元孫伯著之碑

隸釋

金石錄。周末上無闕字及本字。今從隸釋。隸釋曰。襲以興者。謂襲周之後而興。此時墓刻始萌芽。標題未當律令。碑有太歲丁亥字。當是建武或章和年所刻。案碑文云。冑周別封氏衛馘同邑而爲性同焉。

戚本衛孫氏邑。見左傳。其後人因以爲姓。孫氏爲衛同姓大夫。系出於周故云。

碑額書前官例

漢故博陵太守孔府君碑

碑文云。博陵太守遷下邳相河東太守。隸釋。金石錄無漢字。

金石錄曰。孔君自博陵再遷河東。而碑額題博陵。莫曉其何謂。隸釋曰。此碑陰有故吏十三人。皆博陵人。蓋其函甘棠之惠。痛夏屋之傾。相與刊立碑表。故以本郡題其首。案此則故吏爲前官立碑得書前官。此一例也。

漢故車騎將軍馮公之碑

碑文云。車騎將軍坐遜位拜將作大匠河南尹復拜廷尉。坐正法作左校。拜屯騎校尉復廷尉。隸釋。

隸釋曰。碑云。一要金紫。十二銀艾。緄終於廷尉。而以將軍題碑者。尊金紫也。案隸釋所載司隸校尉魯

峻碑。碑文云、拜司隸校尉遭母憂、自乞拜議郎、服竟、還拜屯騎校尉、集古錄曰、峻最後爲屯騎校尉、而碑首題司隸校尉、莫曉其義、隸釋曰、漢人碑誌、或以所重之官揭之、司隸權尊、而秩清、非列校可比、猶馮緄捨廷尉而用車騎也、案隸續載司隸校尉楊

淮碑云、司隸校尉、將作大匠、河南尹、淮終、河南尹、而額題司隸校尉、與魯峻碑同、

高陽令楊君碑。

碑文云、遷高陽令、拜思善侯相、集古錄曰、楊君最後爲口善侯相、其中間嘗爲高陽令、而碑首不書最後官、不詳其義、隸釋曰、漢之王國相、秩

二千石、侯國相與令長等、思善者汝南小國、碑首題以高陽、蓋爾國不若壯哉縣也、

隸續載司徒掾梁休碑。

碑文云、辟司徒府、拜新都令、隸續曰、梁君終於宰邑、而以公府掾書其額者、重內也、

並以前官尊

顯題其額、此又一例也、

漢故領校巴郡太守樊府君碑

碑文云、牧伯劉公、表授巴郡、後漢中、以助義都尉、養疾閭里、又行褒義校尉、同上

隸釋曰、表授巴郡、後漢中、其額以領校巴郡太守稱之者、朝無成命也、後漢中者、亦嘗再表此郡也、助義都尉、褒義都尉、史策未之見、劉焉到蜀、以張魯爲督義司馬、可見助義褒義、皆劉焉率爾創置、案此則前官之出於朝命者、題其額、此又一例也、

碑額標郡邑名例

漢故光祿勳東平無鹽劉府君之碑

集古錄、蔡中郎集、有太尉汝南李公碑、彭城姜伯淮碑、其標目皆以郡名、然其額無明文、故不錄、

隸釋曰、漢人銘墓、以郡邑題其首者、所見惟此一碑、案廟壇碑額、亦題郡邑、金石錄載故太丘長穎

川口陳君壇

隸釋所載壇碑，更闕川字。其言曰：頽之下闕二字。本傳云：頽川許人。此額頽下是川，又一字是許。

隸釋載漢故行梁相事碣孔君之神祠是也。廟碑

壇碑不更爲例。

碑額稱公例

漢故司空宗公之碑

金石錄 案蔡中郎集標目：太尉橋公李公楊公太傅胡公司空楊公太守胡公皆稱公。其碑額當亦稱公。然集中無明文。又司空房植袁逢二碑標目皆書名。此必非碑額也。故悉不錄。

舉一以見例。不備錄其稱公之制。詳後碑文稱公例。府君處士先生並同。

碑額稱侯例

漢故荊州刺史度侯之碑

金石錄 蔡中郎集荊州刺史度侯碑。碑額亦當稱侯。

秦漢人稱公卿曰君侯。史記絳侯世家：廷尉稱周亞夫。樗里子列傳：甘羅稱呂不韋。李斯傳：趙高稱李斯。皆曰君侯是也。兩漢書稱君侯甚多。不備錄。馮衍傳注：載衍與陰就書。前書稱君侯。後書稱明府。案衍傳：就始封新陽侯。故稱君侯。其後帝貶黜外戚賓客。衍由此得罪。意者就亦自貶損。故衍書不復稱君侯。而以太守國相稱之。

然必封侯始稱侯。

漢書劉屈氂傳注：如淳曰：漢儀注：列侯爲丞相稱君侯。師古曰：楊惲傳：邱常謂惲爲君侯。是則通呼列侯之尊稱耳。非必在於丞相也。

猶三公始稱公也。漢末不能如

禮。又省文去君字。故單稱侯。

此墓碑也。廟碑額亦得稱侯。金石錄載張子房碑額：漢故張侯之碑是

也。後不更見。

碑額稱府君例

漢故光祿勳東平無鹽劉府君之碑

見前

漢故河南尹蘇府君碑

金石錄

碑額稱處士例

處士闕叔則碑

蔡中郎集案此集中標目也其碑額當同隸釋載金恭基闕云處士金恭闕上亦標處士與碑額同

朱學勤曰、闕叔則、藝文類聚、引作圈、疑作圈爲是、圈卽四皓圈公之後、姓氏書無闕姓。

碑額稱先生例

郭先生之碑

隸釋

碑額稱故民例

漢故民吳公之碑

金石錄

隸釋曰：漢之仕者，沒有遺愛，其州縣之民爲之采石鑿銘，則自稱曰故民。吳公匿跡韜光，不蒼聘召，作碑者體其謙晦之操，故以民稱之。所謂故民者，物故之民也。

碑額標諡例

漢故太尉車騎將軍特進遼鄉昭烈侯劉公之碑

隸釋

碑額標私諡稱先生而繫以字例

漢文範先生陳仲弓之碑

金石錄 蔡中郎集 貞節先生范史 雲碑 元文 先生李子材碑 標題當同

私諡詳後碑文載私諡例。碑額有稱私諡稱先生不繫以字者。元儒婁先生碑有稱爵稱私諡不稱

先生不繫以字者。漢故司隸校尉忠惠父魯君碑

並見集 古錄

文有詳略不別爲例。

碑無額自標題其首行例

中常侍樊安碑弟一行。漢故中常侍騎都尉樊君之碑

隸釋

碑有額復自標題其首行例

泰山都尉孔宙碑弟一行。漢泰山都尉孔君之銘

隸釋

隸釋曰、凡漢刊其首行卽入詞、无額者或題其前、如張納樊安之比亦甚少、已篆其上、復標其端、惟此

碑、張納碑見
德政碑例

碑文首用維兮例

張賓公妻穿中二柱文、維兮本造此穿者張賓公妻子偉伯云云、維兮張偉伯子長仲云云、隸釋

隸釋曰、維兮猶烏呼之類、案逸周書周祝解曰、維哉其時告汝、維兮猶維哉也、

縣三老楊信碑、惟兮和平大漢元年、同

隸釋曰、惟兮歎息之辭、和平威宗之紀年、案維惟通用、

碑文首用伊歎例

祝長嚴訢碑、伊歎嚴君諱訢字少通云云、金石錄

盧氏見曾校刻金石錄作伊歎、自注、謝本作伊歎、非是、此當如詩噫嘻成王之例、案隸釋載此碑亦作

伊歎、謝本不誤、

碑敍首以官爵冠姓氏上例

楊賜碑。漢有國師司空文烈侯楊公云云。蔡中郎集

武梁碑。故從事武掾云云。金石錄。隸釋載此碑故字上闕。字當是漢字。

苑鎮碑。漢故荊州從事苑君云云。隸釋

丁魴碑。廣漢屬國故都尉丁君云云。同上

楊淮碑。故司隸校尉楊君云云。隸續

碑額既標官爵。序首復標官爵。與標題首行體異意同。德政碑亦有此例。且兼序其郡縣名於姓上者。

隸續武都太守耿勳碑是也。碑文首云。漢武都太守右扶風茂陵耿君云云。後不更見。

碑敍首書卒葬年月日及立碑人例

太傅胡公碑。維漢二十有一世。建寧五年春三月。既生魄。八日壬戌。太傅安樂鄉侯公薨。越若來。四月

辛酉。葬我君文恭侯。於是掾太原王允。雁門畢整。

按畢當作卑。廣韻卑字注云。蔡邕胡太傅碑有太傅掾鴈門卑蓋是也。又後漢皇后紀下。虞美人紀。熹平四年。議郎卑整上言。李賢注。風俗通

曰卑氏鄭大夫卑諶之後。漢有卑躬爲北中太守。亦作卑整可證。

屬扶風會宙。潁川嚴歷等。僉謂公之德也。云云。刊之於碑。用慰哀思。蔡中郎集

朱公叔墳前石碑。維漢二十一世。延熹六年。粵四月丁巳。忠文公益州太守朱君名穆。字公叔。卒於京師。

其五月丙申。葬于宛邑北萬歲亭之陽。舊兆域之南。其孤野云云。設茲方石。鎮表靈域。同上

右例碑敍首書卒葬年月日。其有但書卒年月日。不書葬者。謁者景君墓表。

表云。惟元初元年五月丁卯。故謁者任城景君卒。金石錄

太尉郭禧後碑。

碑云。惟光和二年夏五月甲寅。太中大夫故太尉郭公薨。同上。

益州太守無名碑。

碑云。永壽元年三月十有九日。益州太守口君卒。隸釋

但書卒年月不書

日者。祝長嚴訢碑。

碑云。惟漢中興。卯金休烈。和平元年。歲治東宮。星屬角房。月建朱鳥。中呂之均。顛實徂落。壽不寬宏。經設三命。君獲其央。年六十九。金石錄。隸釋曰。謂庚寅四月。案中呂謝本作中宮。誤。

平輿令薛

君碑。

碑云。惟延熹六年春二月。平輿令薛君卒。同上。案謝本作三月。誤。

北海相景君銘。

銘云。惟漢安二年仲秋口口。故北海相任城景府君卒。隸釋。案闕處當是之月二字。

堂邑令費鳳碑。

碑云。惟熹

平六年。歲徭于大荒。无射之月。堂邑令費君寢疾卒。同上。案金石錄。無歲徭于大荒句。隸釋文全故錄之。

文有詳略。不別爲例。

碑敍首書立碑年月日。敍末書卒年月日。及立碑人例。

敦煌長史武斑碑。建和元年大歲在丁亥二月辛巳朔廿三日癸卯。長史同

下。案此立碑年月日。

以永嘉元年

釋 隸
□月□日遭疾不□。案此卒之年月日於是金鄉長河閒高陽史恢等追惟昔日同歲郎署故□石銘碑以旌明德。

碑文稱公例

太尉橋公碑公諱元云云。蔡中郎集 中郎集 有橋公廟碑亦稱公

太傅文恭侯胡公碑公諱廣云云。同上 中郎集 胡公凡三碑皆稱公

司空宗公碑公諱俱云云。金石錄

故民吳仲山碑吳公仲山云云。同上

太尉太傅司空皆三公也。蔡中郎集更有太尉李咸楊秉楊賜諸碑。司空房楨碑。金石錄有太尉郭禧碑。隸釋有太尉劉寬楊震諸碑。皆稱公是也。漢碑於舉主稱府君常例也。而廷尉仲定碑稱南陽陰府君。又稱南郡胡公。下邳趙公。同是舉主。而陰君爲南陽太守。稱府君。胡公爲太尉。趙公爲

太傅稱公。公之稱不可苟如此。獨吳仲山以故民稱公爲例之變。案古人稱公有數義。天子三公稱公。周之周公召公。漢

之鄧公禹吳公漢是也。

日知錄所引甚多不備錄。日知錄據李善兩都賦注謂漢御史大夫亦稱公。史記鼂錯傳錯父謂錯上初即位公為政用事。侵削諸侯。人口譏多怨公者。後漢書皇后紀獻帝謂邳慮曰邳公天下寧有是

邪時二人皆官御史大夫。是御史大夫稱公也。案此則兩漢書君父稱臣子為公者皆以其爵稱之。或謂君稱臣父稱子得為公非也。

王者之後稱公。周之宋公是也。唐公虞公亦此例。

諸侯之臣

稱君曰公。詩魯公是也。

詩書三傳不備錄。

鄰國之臣稱鄰君曰公。詩譚公是也。

三傳不備錄。

諸侯相稱曰公。左傳鄭伯

稱許公。

隱十一年。

是也。諸侯之臣稱公。左傳齊棠公楚葉公是也。失其名曰公。秦漢之際侯公。

史記秦始皇紀。樞公羽。

紀

呂公。高祖紀。日知錄所引甚多不備錄。

是也。尊其老曰公。戰國時馮公。

齊策馮煖章。

漢白公。

漢書溝洫志。

南公。

項籍傳。

嬴公。

陸宏傳。

建公。

元后傳。

是也。

日知錄又引史記文帝謂馮唐公。秦何蒙辱我。案方言凡尊老周晉秦隴謂之公。

子稱父曰公。戰國策陳軫將之魏。其子陳應止其公之行。史記

留侯世家。吾惟豎子固不足遣。乃公自行耳。又史記太史公。司馬遷稱其父談是也。孫稱祖曰公。呂氏

春秋。孔子之弟子從遠方來。孔子問之曰。子之公不有恙乎。次及其父母兄弟妻子是也。又後漢書鄭

元傳。孔融告高密縣。為元特立一鄉。曰鄭公鄉。以為公者仁德之正號。不必三事大夫。日知錄謂此是

曲說。該餘叢考亦以鄭公為年老稱公。不取仁德之說。竊謂孔融云公者。仁德之正號。此說未為不通。

顧氏趙氏必以孔融所言為非。非也。然則有名德者亦得稱公。又一義也。仲山碑乃其子所立。碑稱仲

山少立名迹約身剛同己節度無隻同不貪仕進云云其稱公者蓋兼子稱父公仁德稱公二例

碑文稱君例

太尉陳球碑君諱球云云

隸釋下並同 陳球二碑碑首皆稱君其下始稱公歐趙書並有此碑隸釋較詳故錄之後倣此

車騎將軍馮緄碑君諱緄云云

光祿勳劉曜碑君諱曜云云

司隸校尉魯峻碑君諱峻云云

冀州刺史王純碑君諱純云云

山陽太守祝睦碑君諱睦云云

竹邑侯相張壽碑君諱壽云云

後漢志太尉公將軍比公光祿勳卿司隸校尉比二千石太守侯國相皆二千石刺史雖六百石其尊在太守上此皆內外尊官而碑文皆稱君故各錄其一以見例其餘內外官自二千石以下至於佐貳僚屬其碑文類皆稱君不可殫錄又案荊州刺史度尚博陵太守孔彪諸碑皆屬吏立碑文稱君司隸

校尉魯峻、高陽令楊著諸碑，皆門生立碑文稱君。

漢碑多門人屬吏所立，無不稱君，略舉數碑以見例。

又費汎袁良碑，孫爲祖立，樊安

碑，子爲父立，鄭固碑，弟爲兄立，碑文皆稱君。此足以證尊卑皆得稱君。今人惟施於朋友及宗戚同輩

行者，若以施於尊者，則斥爲不敬矣。

日知錄曰：漢時曹掾皆稱其府主爲君，至蒼頭亦得稱其主人爲君。後漢書李善傳，君夫人善在此是也。女亦得稱其父爲君。漢書王章傳，我君素剛，先死者必我君是也。婦亦得稱其舅爲君。爾雅：姑舅在則曰君舅，君姑，淮南子：君公知其盜也，逐而去之。列女傳：我無樊

衛二姬之行，故君以責我是也。又曰：喪服妾爲君，鄭注：妾謂夫爲君者，不得體之，加尊之也。雖士亦然。

碑文稱府君例

衛尉衡方碑，府君諱方云云。

集古錄

此歿稱府君也。河南尹蘇君碑，安平相孫根碑，梁相費汎碑並同。其生稱府君者，廟碑則宏農太守樊

毅華嶽碑。

古文苑作樊毅修西嶽廟記，入記類，自注一作碑，案作碑是，碑類有西嶽華山亭碑，亦稱樊府君，與此同。

濟陰太守孟郁修堯廟碑，魯相韓勅修孔廟後碑。

韓勅碑文首稱

君，末稱府君。

德政碑，則桂陽太守周憬功勳銘，司隸校尉楊渙石門頌，巴郡太守張納功德敍。

敍文稱君，標題稱府

君，皆生稱府君也。

廟碑例，德政碑例，不更見。

其墓闕稱府君者，益州太守楊宗墓道，趙相雍勸闕銘，趙傅逢君神道，益

州太守高頤墓闕。闕凡二一
稱府君

交趾都尉沈君墓闕亦歿稱府君也。

墓闕例不更見
以上各碑文不悉錄

費汎乃其孫均立餘

皆故吏門生所立亦稱府君則府君為通稱今人惟子孫稱其祖父已歿者為府君若以稱他人及生而稱之斥為非禮非也。日知錄曰府君者漢時太守之稱三國志孫堅襲荊州刺史王叡叡見堅驚曰兵自求賞孫府君何以在其中孫策進軍豫章華歆為太守葛巾迎策策謂歆曰府君年德名望遠近所歸案府君之稱著於後漢書寇恂傳稱太守耿況劉平傳稱太守孫萌朱暉傳稱太守阮況王龔傳劉表稱太守王暢臧洪傳稱太守張超酷吏傳涼州人稱太守樊仲華高獲傳稱太守鮑昱華陀傳稱太守陳登西南邛都夷傳稱太守張翕又傅燮傳燮為漢陽太守黃衍說燮又周嘉費長房傳吳祐傳注引濟北先賢傳稱太守並為府君不知顧氏何以不引。

碑文稱明府例

北海相景君銘伏惟明府受質自天。隸釋

此歿稱明府也。生亦稱明府。集古錄。朔方太守碑陰。碑陰云延熹四年詔書遷衙令五年正月到官奉見明府案明府未知所指據文當指衙令上官隸釋魯相

韓勅造孔廟禮器碑。碑云韓明府名勅字叔節桐柏淮源廟碑。碑云烈烈明府好古之則案明府指南陽太守是也。蓋明府在漢為太守國相之

通稱。國相秩與太守同。故其稱亦同。其屬國及丞亦得稱明府。隸釋蜀郡屬國辛通達丞李仲曾造橋碑。碑首橫刻稱前漢書韓

辛爲明府。李爲君。碑文稱辛爲明君。李爲明府。對文則別。散則通也。甲君之稱。今所不用。明府則相沿不改也。

延壽何並龔遂。後漢書邳惲。周章。張皓。王龔。臧洪。鍾皓。史弼。杜密。劉寵。彭脩。劉翊。許揚。高獲。李郃。法真

諸傳。並稱太守爲明府。

鄒宏傳注。引謝承書。亦稱太守爲明府。

吳祐傳。稱國相爲明府。孫寶傳。爲京兆尹。張湛傳。爲左馮翊。張

霸傳。梁不疑爲河南尹。亦稱明府。三輔與郡守秩同。又邳惲傳。稱左隊大夫。邊並爲明府。注。王莽以潁川爲左隊。郡守爲大夫。是亦太守稱明府。張湛傳注。郡守所居曰府。府者尊高之稱。是也。若以稱公卿。

則變文稱明公。董卓傳。孫堅稱衛尉張溫。呂布傳。布稱曹操。並爲明公是也。鄧禹傳。稱光武爲明公。時方仕於更始爲大將軍。故云。若

以稱令長。則變文稱明廷。張儉傳。稱外黃令爲明廷。注。明廷猶明府是也。

碑文稱使君例

涼州刺史魏元丕碑。於戲使君。旣膺漆德。隸釋

小黃門譙敏碑。於穆使君。盛德炤明。同上

使君本使者之稱。史記漢書爰盎傳。徙爲吳相。告歸。丞相申屠嘉稱盎爲使君。案盎前爲中郎將隴西

都尉嘗持節出使。故稱使君。漢書王訢傳稱繡衣御史暴勝之爲使君。顏師古注爲使者故謂之使君。使音所吏反。後漢書寇恂傳恂稱更始使者爲使君。李賢注君者尊之稱也是也。其後遂爲校尉刺史通稱。鄧禹傳爲護羌校尉。崔駰傳陳禪爲司隸校尉。並稱使君。第五倫傳爲兗州刺史。傅燮傳耿鄙爲刺史。蓋勳傳梁鵠左章並爲刺史。劉表傳爲荊州刺史。並稱使君是也。臺佟傳稱刺史爲明使君猶明府明公也。又郭伋傳調并

州牧。童兒來迎再稱使君。案百官志孝武帝初置刺史。成帝更爲牧。建武十八年復爲刺史。仍調并州牧。在建武十一年時方省朔方刺史屬并州。是不置刺史。然牧卽刺史更名。故仍稱使君。又袁術傳闔象稱術爲明公。孫策稱術爲使君。同時異稱。案術時自領揚州刺史。故策稱使君。又爲左將軍假節封陽翟侯。故象稱明公。又西羌傳任尙爲中郎將。稱使君。馬援傳注引東觀記馬賓以郎持節號使君。亦

使臣之義。神道碑亦稱使君。見墓闕例。

碑文稱先生例

陳太邱碑先生諱寔云云。

蔡中郎集下同。中郎集載太邱廟碑亦稱先生。又載太邱第二墓碑碑首稱君以下稱先生。

郭有道林宗碑先生名泰云云。

貞節先生范史雲碑先生諱丹云云。

彭城姜伯淮碑先生諱肱云云。

中郎集復有翟先生碑元文先生李子材碑翟先生無名字李子材碑多書名不可爲法不錄

歐趙諸書婁壽郭輔諸碑並稱先生與太邱諸碑同不備錄碑稱先生者多縉紳耆舊所立然太邱第

二碑其子紀立則先生亦通稱也。

郭輔碑女明文立然縉紳撰文故不同

先生有二義周孔之制輩行同而先生者稱先生儀

禮有司徹先生之胥鄭注先生長兄弟賈疏文承長兄弟之下故知先生非老人教學者論語憲問篇

見其與先生並行也包注先生成人也皇疏先生者成人謂先己之生也非謂師也是也。

爾雅先生爲兄包鄭所本

戰

國時則以先生稱其師孟子離婁篇樂正子曰先生何爲出此言也又曾子居武城左右曰待先生者

如此其忠且敬也是也或非師而年齒甚尊以師禮事之者亦稱先生孟子告子篇宋慳將之楚孟子

曰先生將何之是也。

戰國策所稱先生皆然

自是以後先生遂爲尊稱不以稱同輩。

漢人撰禮記所稱先生皆指師而論語爲政篇有事弟子服其勞有酒食先生饌馬

注先生父兄也先從父丹徒君論語駢枝曰年幼者爲弟子年長者爲先生皆謂人子也饌具也有事幼者服其勞有酒食長者共具

之內則曰男女未冠笄者昧爽而朝問何食飲矣若已食則退若未食則佐長者視具長者即先生也具即饌也鄭注內則即訓爲饌

案丹徒君之言是也鄭注儀禮饌皆訓具馬氏以後世先生爲尊稱遂誤解論語

秦漢時或單稱先單稱生陔餘叢考曰史記蘇秦被刺死齊王求其

賊誅之。燕人曰：甚矣齊之爲蘇生報讐也。注：生一作先。言先生也。叔孫通諸弟子以制禮皆賜爲郎。喜曰：叔孫生誠聖人也。弟子稱師曰生，亦謂先生也。漢書貢禹傳：禹請老。元帝報曰：朕以生有伯夷之廉，史魚之直，故親近生。今未得久聞生之奇論也。師古曰：生，謂先生也。時禹年八十餘。元帝敬之，稱生非輕之，乃尊之也。此單稱生也。史記鼂錯傳：學申商刑名於軹，張恢先所。徐廣曰：先，卽先生。漢書梅福曰：叔孫先非不忠也。注：先，猶言先生也。又建元中，上招賢良，公卿曰：鄧先好奇計。注：亦曰鄧先，猶云鄧先生也。此單稱先也。案史記越世家：楚王曰：生休矣。又朱公長男見莊生曰：故辭生去。漢書高帝紀：漢王謂酈食其曰：以魏地萬戶封生。師古曰：生，猶言先生。他皆類此。蒯通傳：韓信曰：生且休矣。稱通爲先生也。賈誼傳：屈原放逐，誼追傷之。其辭曰：于嗟默默生之無故兮。師古曰：生，先生也。後漢書鄧禹傳：光武謂禹曰：生遠來，寧欲仕乎。亦先生也。又漢書儒林傳：漢興言易自淄川田生。言書自濟南伏生。言詩於魯則申培公，於齊則轅固生。燕則韓太傅。言禮則魯高堂生。言春秋於齊則胡毋生。於趙則董仲舒。師古曰：培固者，其人名。公生者，其號也。他皆類此。案此則下文田生、項生、白生、張生、歐陽生、繆生、許生、唐生、褚生、黃生、徐生，皆尊大之稱。是以韓嬰亦稱韓生，董仲舒亦稱董生，而孟喜傳云：喜詐言師田生且死時，枕喜鄰，獨傳喜。梁丘賀曰：田生絕於施讎手中，時喜歸東海，安得此事。喜賀皆田生弟子，稱其師爲田生，是先生之省文也。又案薛氏款識：有虜生鼎、屈生敦、叔猶生敦。此又似子孫稱其先人，不但

弟子稱師也。

碑文稱徵士例

陳太邱碑。徵士陳君。蔡中郎集

韓勅孔廟後碑陰。徵士河南成臯蘇漢明。此廟碑稱徵士。下不更見。隸續曰。漢人題名有稱徵試博士者。此稱徵士。蓋聘召而不行者。陔餘叢考曰。有學行之士。經詔書徵召而不仕者曰徵士。尊稱之則曰徵君。後漢書黃憲傳。天下號憲爲徵君。魏志王肅傳。魏初徵士燉煌周生烈。註經傳。頗行於世。又管寧傳。註引傅子曰。胡徵君怡怡無不愛也。胡徵君謂胡晦。案後漢書姜肱傳。盜聞而感悔。求見徵君。韓康傳。亭長以韓徵君當過。方發人牛修道橋。及見康柴車幅巾。以爲田叟也。使奪其牛。有頃使者至。奪牛翁乃徵君也。此叢考所遺。亦稱聘君。金石錄尉氏令鄭君碑。聘君之孫是也。

碑文稱處士例

處士園叔則碑。伊漢二十有一世處士。有園典字叔則者。蔡中郎集

隸續載嚴發殘碑云。處士嚴發云云。乃桓譙陳章所上表牒之辭。非撰文人所稱。與此異。儀禮鄉射禮云。主人就先生而謀賓介。鄭注。賓介處士賢者。賈疏。案玉藻云。大夫素帶。士練帶。居士錦帶。弟子縞。

帶。鄭元以居士在士之下，弟子之上，解爲道藝處士，非朝廷之士。此處士亦名君子，卽鄉飲酒禮云：徵唯所欲以告於鄉先生，君子可也。鄭亦云：君子有大德行不仕者，以其未仕有德自處，故名處士。君子也。又鄉射禮：大夫與則公士爲賓，注：公士在官之士，鄉賓主用處士。疏：處士卽君子者也。據鄭賈說，則處士乃有賢德而不仕者之稱。漢代近古，故史傳中不輕稱處士。史記魏公子列傳：趙有處士毛公、薛公、張釋之傳：王生者，處士也。循吏列傳：孫叔敖者，楚之處士也。漢書蒯通傳：齊處士東郭先生、梁石君。後漢書劉寬傳：每行縣，止息亭傳，輒引學官祭酒及處士諸生。李賢注：處士，有道藝而在家者。郎顛傳：上書曰：處士漢中李固、張霸傳：表用郡人處士顧奉、公孫松等。徐穉傳：尙書令陳蕃疏曰：伏見處士豫章徐穉、彭城姜肱、汝南袁閔、京兆韋著、潁川李曇，注：謝承書曰：曇與徐孺子等。海內列名五處士焉。楊震傳：亦曰：詔徵處士韋著、劉昭、五行志注：引蔡邕、伯夷、叔齊碑。處士平陽蘇騰，字元成。種暉傳：李燮上書曰：伏見故處士種岱，蓋勳傳注：引續漢書曰：勳表用處士扶風孫瑞、桂陽魏傑。京兆杜楷、宏農楊儒、長陵第五雋、黃瓊傳：上疏曰：伏見處士巴郡黃錯。漢陽任棠、趙岐傳注：引三輔決錄志云：馬融過問趙處士所在。禰衡傳：孔融上疏曰：竊見處士平原禰衡。法真傳：田羽薦真曰：處士法真。此處士之僅見於漢史者也。王氏巖白田集：荅李梅隱書曰：來諭令親棺前題處士之柩，諸人云：然而尊意獨不可以其人爲市肆人也。發論如此，甚服古道。古者銘旌墓誌，有官者稱官，無官者不例稱處士。古之抱道而不

仕則稱處士。謂才德可出而終處也。求其人足稱此名者。必如戰國之魯仲連。秦漢之園綺、黃角。東漢之嚴子陵、黃叔度、徐孺子、郭林宗、申屠蟠。漢末之管幼安、王彥方。晉之陶元亮。宋之謝臬羽、鄭所南。金仁山、許白雲。乃足當之。世道極衰。僭妄無等。販脂胃肺之徒。苟具一棺。無不處士。不知何者爲處士之實。而加此名也。案王氏之言是也。漢碑中如囷叔則嚴發二人。雖不足比於仲連諸人。然亦謹飭自修之士。可稱爲處士。其碑陰書出錢姓名稱處士者。魯相韓勅造孔廟禮器碑。有蘇漢明等三人。

案蘇漢明在孔

廟禮器碑稱處士。在孔廟後碑稱徵士。實一人。

仙人唐公房碑。有祝龜等六人。繁陽令楊君碑。有壬休、申瑒等十二人。吉成侯州輔

碑。有趙訢等五人。

並見隸釋

韓勅孔廟後碑。有孔徵一人。帝堯殘碑。有陳國等四人。鄭季宣碑。有德源等十

人。

並見隸續

此雖不見史傳。然特書以示異。或亦鄉黨自好之士。故尊之曰處士。若酸棗令劉熊碑。宋□許

宗等五十五人。元儒先生婁壽碑。夏仲高等二十九人。皆稱處士。

見隸釋

有才德者。不應如此之多。然則濫稱處士。自漢末已然矣。

碑文稱官例

從事武梁碑。故從事武掾。掾諱梁。字綏宗。掾體德忠孝云云。

隸釋金石錄故上無闕字。體上無掾字。節錄文不備。

廟碑亦得稱官。蔡中郎集。郡掾史張元祠堂碑。孫翻立是也不更見。

碑文稱字例

袁滿來墓碑。茂德休行。曰袁滿來。

蔡中郎集下同。碑文不明言名字。然漢末類皆一字名。知滿來是字。

童幼胡根碑。於惟仲原。應氣淑靈。

碑文云根字仲原。

童子逢盛碑。嘉慈伯彌。天授其姿。

隸釋下同。碑文云盛字伯彌。

督郵斑碑。昂昂子翁。如圭如璋。

碑文云斑字子翁。

戚伯著碑。伯著勃海君元孫。

碑文稱伯著亦稱著。文多不全。其稱著者蓋脫伯字。或省文。

相府小史夏堪碑。嗟叔德。含淑勳。

碑文云堪字叔德。

案袁滿來年十五。胡根年七歲。逢盛年十二。並見碑文。督郵斑碑云。司吾君少子。尙書之小弟。又曰。□

□□賈顏氏遇諸嗟哉吉士。與此爲疇。戚伯著碑云。二七府召禮性仁知。又云。大歲丁亥。娉妻朱氏。旬期著橫遇邪度。不蒙禱卜。奄遂賈歿。夏堪碑云。春華萌。遭雹霜。壽不究。魄蜚揚。此三人亦當是早夭者。六人之中。胡根年七歲最少。已有字。古者二十冠而字。漢代已不如古今人習亂有字。有別字。其來久矣。漢人臨文。幼賤稱字。非幼賤者類稱君。蔡中郎元文先生。李子材碑云。元文先生名休。又云。休少以好學。游心典謨。又云。休盡剖判。剝散幽暗。碑首稱私諡。稱先生。前半敘事。獨用史傳體稱名。不得比於幼賤稱字。且一篇之中。尊之則稱先生。卑之則稱名。古今無此文例也。豈後人點竄。非其原本與。

碑文載私諡例

陳太邱碑。大將軍弔祠。錫以嘉諡。諡曰文範先生。蔡中郎集

范史雲碑。太尉張公兗州劉君。陳留太守淳于君。外黃令劉君。使諸儒參按典禮。作誄著諡。曰貞節先生。上同

李子材碑。時令戴君。臨喪命諡。又云。按典考諡。諡以元文。上同

魯峻碑。於是門生汝南干缺沛國丁直。魏郡馬萌。勃海呂圖。任城吳盛。陳留誠屯。東郡夏侯宏等三百廿

人昭告神明。諡君曰忠惠父。

隸釋

梁休碑。太守安平趙府君。嘉厥高節。守節曰貞。博聞曰文。請諡休爲貞文子。

隸釋

載私諡。必載作諡之人。此定例也。中郎集。朱公叔墳前石碑。忠文公益州太守朱君云云。不言作諡人。然中郎別有朱公叔諡議。載其門人陳季珪等議諡。故墓碑略而不言。隸釋。元儒先生婁壽碑云。國人乃相與論惠處諡。刊石作銘。雖不載議諡人。而渾舉國人以示公議。亦無害於例也。魯峻稱父。梁休稱子者。蔡中郎朱公叔諡議曰。古之以子配諡者。皆諸侯之臣。又曰。周有仲山甫。伯陽嘉父。宋有正考父。魯有尼父。父雖非爵號。天子諸侯咸用優賢禮同。案梁休爲司徒掾。比於古諸侯之臣。是以稱子。魯峻以門生議諡。賢而尊之。是以稱父。隸釋曰。羣下私諡。非古也。末流之弊。更相標榜。三君八顧之目。紛然而奇禍作。案洪氏所言。自是正論。然作碑文者。據事直書。其得失亦自見也。後漢楊厚私諡文父。張霸私諡憲文。陳寔私諡文範。夏恭私諡宣明。子牙私諡文德。范冉私諡貞節。法真私諡元德。并載後漢書本傳。又朱頡私諡貞宣。子穆私諡文忠。見朱暉傳。蔡邕父棧。私諡貞定。見邕傳。荀靖私諡元行。見荀淑傳。作史者大書以明輿論之公。補國典之缺。不必以私諡概從刪削也。陔餘叢考曰。私諡非禮。故荀爽嘗著論正之。見後漢書爽本傳。又宋史。張載卒。門人欲諡爲明誠夫子。司馬光曰。禮記言古者生無爵。

死無諡。檀弓書禮所由失。謂士之有諡。自縣賁父始。曾子曰。賤不諡。貴幼不諡。長惟天子則稱天以諡之。諸侯相諡。猶爲非禮。況弟子而諡其師乎。孔子歿。哀公諡之。不聞弟子復爲之諡也。是溫公亦以私諡爲非禮。與爽同。江氏藩私諡非禮辨曰。漢張璠荀爽以私諡爲非古。然柳下諡惠。黔婁諡康。私諡始於春秋時。不可謂不古也。蓋周人卒哭而諱。左傳申繻曰。周人以諱事神。名終將諱之名者。死者之名也。故於將葬之時。爲諡以易其名。易其名者以諡。易死者之名而諱之也。諱之者。非特子孫不敢斥言。且欲使後人亦不敢斥言。若無爵無諡。則柳下黔婁之賢。乃百世之師。豈可使後人斥言其名哉。此私諡之所以不得不舉也。蓋有爵者行事著於朝廷。其諡賜之於上。無爵者行事見於閭里。其諡定之於下。展禽下大夫。黔婁庶人。皆不得請諡於朝。故門人曾子議私諡焉。曾子問。賤不諡。貴幼不諡。長爲諸侯相諡而發。非私諡也。張璠荀爽不達斯義。輒生駁難。以譏刺當世。謂爲非禮。若從張璠荀爽之言。則曾子爲不知禮矣。

碑額書姓碑文不復書姓但書名字郡邑例

太尉橋公碑。公諱元。字公祖。梁國睢陽人也。

蔡中郎集

陳太邱碑。先生諱寔。字仲弓。潁川許昌人也。

同上

此定例不備錄。間有不書國名郡名而邑名無與同者。如司隸從事郭究碑。碑云君諱究字長全汲人也。於例亦無失

也。其或但書名字不書郡邑者。集古錄。太尉陳球。竹邑侯相張壽。金石錄。丹陽太守郭闕。安平相孫根

諸碑是也。或名字郡邑俱不書者。蔡中郎集。司空房楨。司空袁逢。荊州刺史庾侯。翟先生諸碑是也。金石

錄。平與合薛君碑。隸釋。鄧令景君闕銘。亦無名字郡邑。其有但載姓邑無名字者。隸釋。謁者景君墓表。碑云任城景君卒。北海相景君銘。碑云任城景府君卒。

但載姓字無邑名人名者。隸釋。故民吳仲山碑。碑云吳公仲山。是也。夫名字郡邑不見於碑。其說有二。或其人

德業文章。表著天壤。不待攷碑而知者。或一人立數碑。已見他碑。不妨從略者。然非例之正也。至於人不甚著。而乃靳此名字郡邑十餘字。使其後世泯滅無聞。撰文者獨何心哉。碑文先書諱。次書字。次書郡邑。常例也。古文苑。載張平子碑云。河間相張君。南陽西鄂人。諱衡。字平子。與常例異。不錄。

碑額書姓碑文復書姓例

河間相張平子碑。河間相張君云云。見前注下同

故民吳公碑。吳公仲山云云。

漢碑無額者。碑文書姓。隸續嚴訢碑無額。其文云。伊歎嚴君諱訢是也。碑有額而復書姓者。所見惟此二碑。例之變也。然自唐宋以來。相沿已久。文之工拙。本不係此。故錄之。吳公碑乃其子立。尊之故字而不名。以樊安碑書名較之。此爲變例。又案改姓者。碑額雖書所改之姓。碑文必敍其本姓及改姓之由。與史傳體同。不得執碑額書姓。碑文不復書姓之說。水經注。阪水篇。虞縣故城。東有漢司徒盛允墓。碑允字伯世。梁國虞人也。其先奭氏。至漢中葉。避孝元皇帝諱。改姓曰盛。酈氏所云。似是碑文。然無明文。不能立例。附錄於此。

墓在故里碑文但書名字不書郡邑例

梁相費君碑。梁相諱汎。字仲慮。此邦之人也。金石錄

此省文法。然於例無失。廟碑亦有此例。隸釋。楚相孫叔敖碑云。楚相孫君諱饒。字叔敖。本是縣人。也是也。下不更見。水經注。清水篇。獲嘉縣故城西。有漢桂陽太守趙越墓。冢北有碑。越字彥善。縣人也。案縣人二字。當卽碑文。今無文以證之。附錄俟攷。

漢石例卷二

墓碑例

碑文渾書先世高曾祖父不名例

童子逢盛碑。薄令之元孫。遂成君之曾孫。安平君之孫。五官掾之長子也。

金石錄 豫州從事尹宙碑。東平相之元會稽太守之曾孫字。不可爲法。

此渾書四世也。其有渾書三世者。太尉橋公碑。

碑云。大鴻臚之曾孫。廣川相之孫。東萊太守之元子也。蔡中郎集

元儒先生婁壽碑。

碑云。曾祖父攸。春秋以大

夫侍講至五官中郎將。祖父太常博士。徵朱爵司馬。親父安貧守賤。不可榮以祿。隸釋

渾書二世者。司空文烈侯楊公碑。

碑云。公惟司徒之孫。太尉公之胤子。

太守胡公碑。

碑云。交趾都尉

之孫。太傅安樂侯之子也。

汝南周巨勝碑。

碑云。陳留太守之孫。光祿勳之子也。

袁滿來碑。

碑云。太尉公之孫。司徒公之子。並見蔡中郎集。隸釋。幽州刺史朱龜碑。隸續。郎中王政碑同。

渾書二世。一

爲遠祖。一爲近代者。孔德讓碣。

碑云。宣尼公二十世孫。都尉君之子也。集古錄

博陵太守孔彪碑。

碑云。孔子十九世之孫。顯川君之元子也。隸釋。

渾書二世

及世父叔父者。議郎元賓碑。

碑云。魯相之孫成德。下缺。東安平令北海相。下缺。守之弟子。中牟令兄子也。隸釋。

渾書二世及兄弟者。淳于長夏承碑。

碑云、東萊府君之孫、太尉掾之
中子、右中郎將弟也。金石錄 渾書一世者、太傅文恭侯胡公碑。碑云、交趾都尉之元子也。蔡中郎集。 金城太守殷君碑。碑云、大匠君之子也。

古 太尉陳球碑。碑云、廣漢太守之元子也。集古錄。隸釋。郎中 渾書一世但書遠祖者、泰山都尉孔宙碑。碑云、

十九世之孫也。集古錄 渾書一世及兄弟者、費鳳別碑。碑云、梁相之元子。九 督郵斑碑。碑云、司吾君少子。尚書 然古人臨文不

諱、豈以不稱其先世名為敬哉、使其先世無所表見、而子孫金石之文、又不載其名字、豈孝子慈孫顯揚褒大之意哉、撰文者權其先世顯晦、或名或不名可也。金石錄曰、漢時碑碣載其家世、皆止書官爵、蓋為子孫作銘、不欲名其祖父、最為得體、然非當代顯人、遂莫知其為

何人也。容齋三筆、碑誌之作、本孝子慈孫、欲以稱揚其父祖之功德、播之當時、而垂之後世、當直存其名字、無所避隱、然東漢諸銘、載其先代、多只書官、如淳于長夏承碑云、東萊府君之孫、太尉掾之中子、右中郎將之弟、李翊碑云、牂牁太守曾孫、謁者孫、從事君元

子之類是也。

先敘遠祖後敘近代俱不名例

漢太尉楊公碑、姬姓之國有楊侯者、公其後也、其在漢室、赤泉侯佐高、丞相翼宣、咸以盛德、光于前朝、

司徒考太尉、繼跡宰司、咸有助烈。蔡中郎集

先敘遠祖後敘近代遠祖名近代不名例

太尉楊公碑其先蓋周武王之穆晉唐叔之后也末葉以支子食邑于楊因氏焉周室既微裔胄無緒暨漢興烈祖楊喜佐命征伐封赤泉侯嗣子業紱冕相繼公之不考以忠蹇亮弼輔孝安登司徒太尉蔡中郎集

同下

太尉汝南李公碑蓋秦將李信之後孝武大將軍廣之胄也枝流葉布家于茲土文武繼踵世為著姓曾祖父江夏太守伯父東郡太守此近代兼及伯父不別為例

彭城姜伯淮碑其先出自帝膺在皇唐蓋與四岳共葉能禮於神舜命秩宗爰封于呂其裔呂望佐周克殷俾侯齊國姓有姜氏即其後也高祖祖父皆豫章太守潁陰令

右例竹邑侯相張壽司隸校尉魯峻等碑略同並見又有同是近代高祖名祖父不名者太尉橋公廟隸釋

碑碑云橋氏之先出自黃帝帝葬于橋山子孫之紹基立姓者咸以為氏漢興世以禮樂為業高祖諱仁位至大鴻臚列名於儒林祖侍中廣川相考東萊太守蔡中郎集高祖及父皆不名高祖稱官父

稱字者戚伯著碑碑云勃海君元孫季景長子也隸釋又有遠祖字近代名者元文先生李子材碑碑云其先李伯陽周柱下史觀衰世而遁焉其後雄俊豪

傑。往往。幅出。自戰國及漢。名臣繼踵。支胄散逸。其遷于宛尙矣。王莽竊位。漢祚中移。考匡。佐世祖。匡復郊廟。錫封茅土。卿相牧守。于時相逐。蔡中郎集。不書遠祖近代。但書祖字而不名者。司隸

校尉楊淮碑。碑云。大司隸孟文之元孫也。隸釋。書遠祖不書近代。但書兄。遠祖名兄不名者。金鄉長侯成碑。碑云。其先出自幽岐周文之後。封于

鄆。鄆共仲。賜諡曰侯。厥膺宜多。目功佐國。要盟齊魯。嘉會自那。因目爲家焉。漢之興也。侯公納策。濟大上皇於鴻溝之阨。諡曰安國君。曾孫。譚封明統侯。光武中興。元孫。霸爲臨淮太守。擁兵從光武。平定天下。轉拜執法。右刺姦五威司命。大司徒公。封於陵侯。枝葉繁茂。

或家河洧。或邑山濟。君則上黨太守之弟。同上。世有遠近。名有顯晦。故或書或不書。附錄於此。不別爲例。

先敘近代後敘遠祖俱不名例

陳留太守胡公碑。交阯都尉之孫。太傅安樂鄉侯少子也。其先與楚同姓。別封于胡。以國爲氏。臻乎漢奕

世載德。不替舊勳。蔡中郎集

北軍中候郭仲奇碑。元城君之第四子。其先蓋周之冑緒。虞郭建國。享土受胙。政衰道失。晉克其邦。遭癘

項之際。高祖初起。運天苻命。庠秦摘楚。遂定漢基。枝葉雲布。列於國郡。隸釋

隸釋。郎中馬江碑。廣漢屬國候李翊碑。略同。

先敘近代後敘遠祖近代不名遠祖名例

鴻臚陳君碑。君太丘君之元子也。始祖有虞。受禪陶唐。亦以命禹。其後媯滿。當周武王時。祚土于陳。君其

世也。古文施。

太尉陳球後碑。君廣漢太守之元子也。蓋周存六代。媯滿繼虞。建國于陳。逕完祖齊。實爲陳氏。公下父自

營州來宅海淮。世就典籍。兼通勤誨。振裘褐。卽徵聘。荅宰司。荷顯貢者。繼世而傳焉。隸釋

先敍近代旁及伯叔兄弟子姓俱不名後敍遠祖名例

安平相孫根碑。司空公之伯子。樂安太守之兄子。漢陽太守侍御史之兄。乘氏令之考。厥先出自有殷。元商之系。子湯之苗。聖武定周。封比干之墓。屠裔分析。避地匿軌。姓曰孫焉。金石錄

金石錄曰。姓苑。姓纂皆云。孫氏衛武公子爾。爲衛上卿。因氏焉。此碑云。比干之後。蓋古人或因賜性命。或以官。或以封。或以居。或以王父字爲氏。故姓氏雖同。而源流或異。碑文有先敍近代。旁及兄弟。

不及伯叔子姓。俱不名。後敍遠祖名者。小黃門譙敏碑。碑云。鄴君之中子。章君之弟。郎中君之昆也。其先故國師譙。深明英陳。識錄圖緯。能精徹天意。傳道與京君明。君承厥

後不悉其美。隸釋又有先世書字。兄弟書名者。斥彰長碑。碑云。祖字興先。爲執金吾。弟颯。漁陽太守。金石錄附錄於此。不別爲例。

敍遠祖不敍近代遠祖名例

文範先生陳仲弓碑其先出自有虞氏中葉當周之盛德有媯滿者武王配以太姬而封諸太昊之墟是為陳胡公春秋之末失其爵土遂以國氏焉世督懿德令聞丕顯蔡中郎集下同

貞節先生范史雲碑先生陶唐氏之後也其在周室有士會者為晉大夫以受范邑遂以為氏漢文景之際爰自南陽來家于成安生惠延熹二年官至司徒廷尉君則其後也

瑯琊王傅蔡公碑蓋倉頡之精胤姬稷之末胄也昔叔度文王之昭建侯于蔡以國氏焉迄于平襄周祚微缺王室遂卑齊晉交爭強楚侵陵昭侯徙于州來公族分遷氏家于圉奕葉載德常歷官尹以逮于茲

太尉楊震碑金石錄山陽太守祝睦碑隸釋荊州刺史度尙碑隸釋略同廟碑亦有用此例者郡掾史張元祠堂

碑蔡中郎集是也金石錄又載巴郡太守樊敏碑敍周太王文王武王皆書名妄甚不可為法

敍遠祖不敍近代遠祖不名例

先生郭輔碑其先出自有周王季之中子為文王卿士食采隸釋作於號至於武王錫而封之後世謂之

郭春秋之時為誓所并歷隸釋作戰國秦漢子孫派分隸釋作來居荆土氏國立姓焉集古錄

詳敘先世功德書名例

國三老袁良碑。厥先鬻苗。世爲封君。周之興。虞闕父典陶正。嗣滿爲陳侯。至元孫濤塗。初氏父字。立姓曰袁。魯僖公四年爲大夫。哀十一年頗作司徒。其末或適齊楚。而袁生口獨留陳。當秦之亂。隱居河洛。高祖破項。實從其册。天下既定。還宅扶樂。孝武征和三年。生曾孫榦。斬賊公先勇。拜黃門郎。封關內侯。食遺鄉六百戶。後錫金紫。僂脩城之甃。榦薨。子經嗣。經薨。子山嗣。傳國三世。至王莽而絕。君卽山之曾孫。釋 隸

隸釋。綏民校尉熊君碑。略同。按敘述先世。稱美不稱惡。此定例也。校官碑敘其先世。獨及弑君之潘崇。此固古人直筆。然華耦無故揚其先人華督之惡。左氏譏之。則校官碑固不可爲訓。

詳敘先世功德不書名例

藁長蔡湛頌。其先闕周封叔。闕案叔下當是度字。似宜入遠祖書名例。然下文詳敘先世功德不書名。因別爲此例。葉文王采食蔡。闕黜其氏。廉世卿尹。有功

王室。迄於大漢。繼踐繁隆。內任台翼。外作股肱。元初之□□□擾攘君考銜詔。東掃其難。宰化闕苻守吳

郡再莅□□復牧青州。胤聲所加。□□布愛樹之美。釋 隸

隸釋。巴郡太守張納。敦煌長史武斑。梁相費汎。浚儀令衡立。諸碑略同。

詳書先世功德旁及伯叔兄弟功德例

漢成陽令唐扶頌其先出自慶都感赤龍生堯王有天下大號爲唐治致雍熹尊天重民禪位虞□光受茅土通天三統苗胄枝分相土眠居因氏唐焉累世含祚受天之祐胤嗣彌光爲漢台輔君父孝廉郎中早卒季父蜀郡從弟會稽會稽從弟南陽君從兄東萊太守南陽弟司空公在朝透隨正色竭忠爲國討梟六侯俱封受土襲爵金縉十三

隸釋

北軍中候郭仲奇碑其先蓋周之胄緒虞郭建國享土受胙政衰道失晉克其邦遭竊項之際高祖初起運天苻命斥秦擣楚遂定漢基枝葉靈布列於國郡或潁川馮翊公卿校尉將相州郡令問休貴自東郡衛國家於河內汲

隸釋於誤乎汲誤
彼據集古錄改正

亦世載德以臻于君君惠兄竹邑侯相次尙書侍郎次濟北相順弟臨

沂長次徐州刺史次中山相次雒陽令咸以孝廉公府茂選貞亮皦白翼翼瑛彥配周之八爲國楨榦

同上

平都相蔣君碑

旁及從父文多闕

書天潢先世例

酸棗令劉熊碑厥祖天皇帝垂精接感篤生聖明□仍其則子孫亨之分源而流枝葉扶疏出王別胤

受爵列士封侯載德相繼丕顯光武皇帝之元廣陵王之孫俞鄉侯之季子也

隸釋

隸釋太尉劉寬光祿勳劉曜碑略同

書國戚先世例

中常侍樊安碑厥祖曰仲山父翼佐周宣出納王命爲之喉舌目致中興食采于樊子孫氏焉亦世載德守業不愆在漢中葉篤生哲媛作合南頓實產世祖征討叛逆復漢郊廟而樊氏以帝元舅顯受茅土封寵五國壽張侯目公德加位特進其次竝以高聲處鄉校侍中尙書據州典郡不可勝載爲天下著姓

古文

施

一人立二碑皆書名字邑里世系例

太尉劉寬碑公諱寬字文饒宏農華陰人也其先□□聖漢王侯繼次有國有號列存家序公之考乃作

司徒輔毘安順勳載二葉故吏李謙等立劉寬後碑□□□□文饒宏農華陰人也厥祖出自□□□臣王侯相

繼遭漢中微失其爵士世祖復降仍有顯位光輔王室公之考作司徒於安□□勳績昭乎前朝

門生 殷苞

等立。
隸釋。

一人立二碑一敍名字近代及遠祖一敍名字近代不及遠祖例

陳留太守胡公碑。君諱碩。字季叡。交阯都尉之孫。太傅安樂鄉侯少子也。其先與楚同姓。別封於胡。以國為氏。臻乎漢。奕世載德。不替舊勳。縉紳及門人立太守胡公碑。君諱碩。字季叡。交阯都尉之孫。太傅安樂侯之子

也。
主簿高吉等立
蔡中郎集

左氏襄三十一年傳。立胡女敬歸之子子野。杜預注。胡歸姓之國。又春秋昭十一年五月。夫人歸氏薨。杜注。胡女歸姓。九月。葬我小君齊歸。何休公羊注。歸氏。胡女。史記集解引服虔曰。胡歸姓之國也。是胡非楚同姓。

一人立二碑皆書遠祖不書近代一載名字里一不載名字里例

山陽太守祝睦碑。君諱睦。字元德。濟陰太守已氏人也。其先蓋高辛氏之火正。以能淳耀天地曰祝融。遂獲豐阜之胙。輝裔昌遠。大乃侯伯。分仕諸夏。鄭有祝聃者。君其胤也。未載立碑姓名祝睦後碑。伊余祝君。兆自藜

辛。祝融苗胄。承獲禎慶。光裔熾藐。分仕六國。張雄諸夏。鄭有祝聃者。君其胤也。昔祖仕湯。湯治於梁。洮顛

自朔家于濟陰。故吏王堂等立。隸釋。

一人立二碑皆書名字及遠祖近代一書近代名一不書近代名例

太尉陳球碑君諱球字伯真。有虞氏之裔也。當周盛德。有虞遏父爲陶。下公生公子完。適齊。爲桓公正。

其後強大。遂有齊土。楚漢之。下官生七有令名。廣漢太守。故吏陳球後碑。君諱球字伯真。廣漢太守之元

子也。蓋周存六代。媯滿繼虞。建國于陳。選完徂齊。實爲陳氏公。下父自營州來宅海淮。末載立碑姓名。隸釋。

隸釋曰。水經注陳球墓前有三碑。是弟子管寧華歆等造。此碑所見。皆故吏故民。而無管華姓名。豈與劉寬碑相類。其一則弟子所立乎。陳公兩碑。皆在淮陽。水經謂墓前有三碑。似指碑陰爲一也。

一人立二碑一敍先世一不敍先世例

陳太邱碑先生云云。河南尹立。文範先生陳仲弓碑。其先出自有虞氏。中葉當周之盛德。有媯滿者。武王配以

太姬。而封諸太昊之墟。是爲陳胡公。春秋之末。失其爵土。遂以國氏焉。世督懿德。令問丕顯。子紀立。蔡中郎集。

堂邑令費鳳碑。君體履柔和云云。妻弟卜盾立。費鳳別碑。君諱鳳。字伯簫。梁相之元子。九江太守之長兄也。世

德襲爵銀艾相亞。舅家中孫石勳立 隸釋

隸釋、廣漢屬國都尉丁魴碑。不敍先世。其有別碑與否。無文以明之。

一人立三碑兩碑敍名字先世一碑不敍名字先世例

太傅文恭侯胡公碑。公諱廣。字伯始。交阯都尉之元子也。故吏池喜立太傅胡公碑。維漢二十有一世云云。掾王允等

立。胡公碑。公諱廣。字伯始。南郡華容人也。其先自媯姓建國南土曰胡子。春秋書焉。列于諸侯。公其後也。

考以德行純懿。官至交阯都尉。故吏許翽等立 蔡中郎集

媯姓乃歸姓之誤。見前。左氏昭四年胡子始見於經。杜注。胡國汝陰縣西北有胡城。胡在汝南。故云建國南土。

一人立三碑一略敍先世不載名字一詳敍名字邑里及先世一僅載名字例

司空文烈侯楊公碑。曰漢有國師司空文烈侯楊公。公惟司徒之孫。太尉公之胤子。子彪立漢太尉楊公碑。

公諱賜。字伯猷。宏農華陰人。姬姓之國有楊侯者。公其後也。其在漢室。赤泉侯佐高。丞相翼宣。咸以聖德。

光于前朝。祖司徒。考太尉。繼跡宰司。咸有勳烈。屬吏立文烈侯楊公碑。公諱賜。字伯猷。云云。門人立蔡中郎集

水經注載橋元三碑。秦頡二碑。金石錄載郭臈二碑。文不全載。無以知其體例。

書薨例

太尉橋公碑頌。光和七年五月甲寅薨。蔡中郎集

書卒例

文範先生陳仲弓銘。中平三年八月丙子卒。同上

書不祿例

元儒婁先生碑。熹平三年二月甲子不祿。集古錄案隸釋作正月。至所載集古錄仍作二月。疑正字誤。

孔德讓碣。永興二年七月遭疾不祿。同上案謝本集古錄作一年。據隸釋及所載集古錄並作二年。今從之。

曲禮。天子死曰崩。諸侯曰薨。大夫曰卒。士曰不祿。此常稱也。錄其一二以見例。不備錄。鄭氏注曲禮曰。自上顛壞曰崩。薨。顛壞之聲。卒。終也。不祿。不終其祿。正義崩者。墜壞之名。譬若天形墜壓然。薨者。崩之

餘聲也。諸侯卑死不得效崩之形。但如崩後之餘聲。卒畢竟也。大夫是有德之位。仕能至此。亦是畢了平生。故曰卒。士祿以代耕。而今遂死。是不終其祿。曲禮又曰。壽考曰卒。短折曰不祿。鄭注。謂有德行。任爲大夫士而不爲者。老而死。從大夫之稱。少而死。從士之稱。案下不得兼上。故崩薨之稱。大夫以下不敢稱也。上得兼下。故春秋書他國君薨。皆曰卒。又左氏成十三年傳。呂相絕秦曰。無祿。獻公卽世。無祿。文公卽世。諸侯亦稱不祿。昭七年傳。子產爲豐施歸州田於韓宣子曰。日君以夫公孫段爲能任其事。而賜之州田。今無祿早世。大夫亦稱不祿。然則卒與不祿。又諸侯以下之通稱也。

書終例

陳太邱碑。中平三年八月丙子。遭疾而終。

蔡中郎集

隸續。封邱令王元賓碑。遭命而終。冀州從事郭君碑。晡忽而終同。案檀弓。君子曰終。小人曰死。注。死之言漸也。事卒爲終。消盡爲漸。正義。君子之死。謂之爲終。言但身終。功名尙在。若小人之死。但謂之爲死。無功名可錄。但形骸漸盡也。按終死對文則別。散文則通。

書不瘞例

廷尉仲定碑。熹平元年孟秋上旬。君遭疾不瘞。

金石錄

隸釋、竹邑侯相張壽碑、遘疾無瘳同。

書丁憂例

太尉汝南李公碑、徵河南尹、母憂乞行、服闋奔命。蔡中郎集

貞節先生范史雲銘、除郎中萊蕪長、未出京師、喪母行服。同上

右明書丁憂、水經注清水篇、桂陽太守趙越碑。碑云、遭憂服闋。泚水篇、日南太守胡著碑。碑云、遭母憂。隸釋博陵太守

孔彪碑。碑云、遭大君憂服竟還署。廣漢屬國侯李翊碑。碑云、遭從事君憂去官。太尉陳球後碑。碑云、遭繼母憂、禮紀向闋、羣公爭招。安平相孫根碑。碑云、遭公夫人憂服

闕徵拜議郎。案碑云、司空公之伯子、故根之母稱公夫人。涼州刺史魏元丕碑。碑云、遭秦夫人憂服闋還臺。巴郡太守樊敏碑。碑云、遭離母憂、五五斷仁、洪氏曰、五五與費鳳碑、非五五同義、謂

二十五。碑云、以母憂去官。並書憂與李公碑略同。隸釋冀州刺史王純碑。碑云、喪父服除復拜郎。

衛尉衡方碑。碑云、會喪大夫人、寢闋苦出、仍口上言倍榮向哀禮服、祥除、徵拜議郎。司隸校尉魯峻碑。碑云、喪父如禮。太尉陳球碑。碑云、喪母去官。服除辟司徒府。光祿勳劉

曜碑。碑云、喪母服。闕復為郎中。並書喪與范史雲銘略同。

成臯令任伯嗣碑。除江州令。以服去官。金石錄

石渾書丁憂

丹陽太守郭昱碑。目父憂去官。還拜郎中侍御史。遭母喪服除。復拜郎中治書侍御史。續錄

右連書丁憂

案漢代近古。日知錄所載韋義楊仁譙元戴封馬融陳實賈逵范滂劉衡圉令趙君曹全度尙楊著陳重王純諸人。並以期功之喪。丁憂去官。其未載者。蔡中郎集。陳留太守胡公碑。遭叔父

憂。以疾自免。隸釋。繁陽令楊君碑。會叔父太尉公薨。委榮輕舉。投黻如遺。隸續。司隸校尉楊淮碑。弟弼

西鄂長伯母憂去官是也。今人有能行者。是宜特書。以示旌異。然不數見。故不立例。又漢代尊舉主。持

服去官。隸釋。太尉劉寬二碑。並云喪舊君去官是也。持服之事。雖始于管仲。見禮記雜記然非禮也。故不錄。

書告病例

太尉橋公碑頌。遷河南尹。遂陟司徒。託病遜位。起家拜尙書令。以疾篤稱。拜光祿大夫。後拜太尉。久病自

替。蔡中郎集
下同

太傅文恭侯胡公碑。封安樂鄉侯。錄尙書事。稱疾屢辭。策賜就第。復拜司空。功成身退。俾位特進。又拜太

尉復以特進致命休神。又拜太尉。遜位歸爵。旋于舊土。徵拜司徒。疾病就第。

汝南周巨勝碑。初以父任拜郎中。疾去官。察孝廉。是時郡守梁氏。外戚貴寵。非其好也。遂以病辭。

三碑皆屢稱引疾。疾輕而病重。包氏注論語曰。疾甚曰病也。鄭氏注曰。病。謂疾益困也。許氏說文曰。疾病也。病。疾加也是也。故文先疾而後病。若僅一引疾。則但稱疾。中郎集司空楊公碑。見遭姦黨。用嬰疾廢。大尉汝南李公碑。功遂身退。以疾自遜。陳留太守胡公碑。遭叔父憂。以疾自免。皆單稱疾。此類甚多。不復備舉。隸釋泰山都尉孔宙碑。會遭篤病。告困致仕。梁相費汎碑。延究眉耆。被病孫位。此則遭病而歸。旋即殞歿。故書病。吉成侯州輔碑。遷臧府令。後以病孫位。此則真病去官。故亦書病。巴郡太守樊敏碑。投核長驅。畢志枕邱。國復重察。辭病不就。云云。秋老乞身。以助義都尉。養疾閭里。云云。此蓋先以真病辭官。後以微疾遜位。各書其實。與例不相妨也。

書歷年及卒年月日例

太尉橋公碑。春秋七十五。光和七年五月甲寅。薨。

蔡中郎集

郭有道林宗碑。享年四十有三。以建寧二年正月乙亥卒。

同上

朱學勤曰。郭林宗年。後漢書作四十二。碑文出重刻。疑誤。

衛尉衛方碑年六十有三建寧元年二月五日癸丑卒

集古錄

吳郡丞武開明碑壽五十七建和二年十一月十六日遭疾卒

金石錄

國三老袁良碑載八十五永建六年二月戊辰卒

見卷一

書春秋書享年書年書壽書載各錄其一以見例其有書歷年不書卒年月日者梁相費汎碑

碑云春秋八十

卒

書歷年及卒年不書月日者太尉汝南李公碑

碑云七十有六嘉平四年薨蔡中郎集

廣漢屬國候李翊碑碑云年五十四以熹平二年卒隸

釋

書歷年及卒年時不書月日者瑯琊王傅蔡公碑

碑云年五十八永興六年夏卒蔡中郎集

書歷年及卒年月不書日者議

郎元賓碑

碑云年四十八延熹二年二月卒金石錄

圜令趙君碑

碑云年六十有八以中平五年冬十一月卒同上

書歷年及卒年日不書月者胡公碑

碑云

年八十有二建寧五年春壬戌薨于位

蔡中郎集案胡公有三碑其二碑有卒月故此碑略之

文有詳略無義例也

書卒年月日及歷年閒以事蹟例

陳留太守胡公碑建寧元年召拜議郎云云其年七月被尚書召云云其明二十一日遣吏云云是日疾

大漸刻漏未分奄忽而卒時年四十一蔡中郎集

書歷年及卒葬年月日例

太傅文恭侯胡公碑。春秋八十二。建寧五年三月壬戌薨于位。四月丁酉葬于洛陽塋。蔡中郎集 又一碑云。維漢二十有一世建寧

五年春三月既生魄八日壬戌太傅安樂鄉侯胡公薨越若來四月辛酉葬我君文恭侯 見卷一

趙相劉衡碑。年五十有三。以中平四年二月戊午卒。其四月己酉葬。金石錄

此常例不備錄。其有書歷年不書卒年月日。書葬年月不書日者。司隸從事郭究碑。碑云。春秋二十八而卒。中平元年歲在甲子。三

月而葬。集古錄書卒年月日書葬年月不書日者。冀州從事郭君碑。碑云。君年卅一。以光和二年大荒較紙。月戊申晦。詔而終。三年十月葬。隸釋文有詳略。

無義例也。

渾書歷年例

丹楊太守郭旻碑。年過耳順。寢疾癘頽。金石錄

渾書卒年例

巴郡太守樊敏碑。歲在汁洽。紀驗期臻。奄忽臧形。隸釋

李翊夫人碑。歲在大淵獻。精魂奄昏。飛神天庭。收荆元都。同上

渾書卒例

武氏石闕銘。被病云歿。苗秀不遂。金石錄下同

祝長嚴訢碑。顛實徂落。壽不寬宏。經設三命。君獲其央。從事武梁碑。遭疾隕靈。

逢童碑。嘘噏不反。天隕精晃。

郎中鄭固碑。遭命隕身。隸釋

書在官病卒例

淳于長夏承碑。建甯三年六月癸巳。淹疾卒官。金石錄

太傅文恭侯胡公碑。建寧五年三月壬戌，薨于位。見前

金城太守殷君碑。以光和元年九月乙酉卒官。古文苑

綏民校尉熊君碑。以廿一年三月廿七日丙寅卒官。隸釋下同

熊君碑上文有興平元年，故不載年號。

益州太守高頤碑。建安十四年八月於官卒。

書致仕病卒例

北海相景君銘。去官未旬，病乃困危。珪璧之質，臨卒不回。隸釋下及注同。病卒當書年月，此不書者，已見碑首。

慎令劉脩碑。素苦風痺，到官期月，見臣吏勅兒子，人命嗙吸，不欲煩擾吏民，欲生見舊土，歸終於家。百姓追逐，扣馬攔輪，遂不復還。建寧四年五月甲戌卒。

右致仕旋即病卒

泰山都尉孔宙碑。會遭篤病，告困致仕，得從所好。延熹六年正月乙未，案闕處當是卒字。

司隸校尉魯峻碑。以病遜位。閉門靜居。任書自娛。熹平元年□月癸酉卒。
安平相孫根碑。以疾去官。闔門守家。不競時榮。養育孤穉。以保壽年。上乾弗祐。獲疾固□□□以光。和四年十二月乙巳卒。

右致仕久始病卒。國三老袁良碑。以病致仕。永建六年二月戊辰卒。囿令趙君碑。被疾去官。以中平五年冬十一月壬寅卒。梁相費汎碑。被病遜位。春秋八十卒。凡致仕旋即病卒。與久死病卒者。皆得通用。

書歸葬例

劉鎮南碑。時道路艱險。留墳州土。子授徵拜五官中郎將。乃疏上請歸本縣葬。見聽許。太和二年葬於先塋。蔡中郎集

朱公叔墳前石。延熹六年夏四月丁巳。卒于京師。其五月丙申。葬于宛邑北萬歲亭之陽。舊兆域之南。同上
案朱公叔碑。卒葬皆書地。劉鎮南碑。卒不書地。葬書地。文有詳略。不別爲例。

書不歸葬例

文範先生陳仲弓銘。昔者先生。甚樂茲土。築室講誨。精靈所寧。紀順奉雅意。遂定兆域。又一碑云。臨沒顧命留葬所卒。蔡中郎集

後漢書張霸傳遺勅諸子曰昔延州使齊子死嬴博因坎路側遂以葬焉今蜀道阻遠不宜歸塋可止此葬足藏髮齒而已崔駰傳瑗臨終顧命子寔曰夫人稟天地之氣以生及其終也歸精於天還骨於地何地不可藏形骸勿歸鄉里寔奉遺令遂留葬洛陽梁鴻傳疾且困告主人曰昔延陵季子葬子於嬴博之閒不歸鄉里慎勿令我子持喪歸去及卒伯通等爲求葬地於吳要離冢傍此皆不歸葬之證

書合葬例

議郎胡公夫人哀讚中平四年薨于京師顯追惟考君存時之命迎棺舊土同穴此城

蔡中郎集

隸釋相府小史夏堪碑娉會謝氏并靈合柩古命有之仲泥何咤此周禮嫁殤也不錄 陔餘叢考曰合葬墓誌近代如王遵巖王弇州集中皆書曰某君暨配某氏合葬墓誌識者非之以爲古人合葬題不書婦今日暨配某者空同以後不典之詞也考唐宋書法並無合葬二字但云某君墓誌而已其妻之祔則於誌中見之陳君立曰叢考謂始於空同非也唐太和時徐府君墓誌其額題徐府君劉夫人合祔銘蓋始於唐案叢考謂書合葬非古是也夏堪碑不曰暨配謝氏下文馬江侯成碑同此漢碑定例也胡公先葬已有墓銘夫人後葬別爲哀讚故與同時合葬者不同

書不合葬例

交趾都尉胡夫人黃氏神誥。自郡尉仕于京師。及廣兄弟。式敍漢朝。夫人居京師。六十有餘載。欲留此焉。康寧之時。亟以爲言。建寧二年薨。公銜哀悼。祇慎其屬。遵奉遺意。不敢失墜。乃俾元孫顯咨度羣儒。以考其衷。僉曰。昔帝舜歿於蒼梧。殯於虞郊。二妃薨於江湖。不卽兆於九疑。延陵季子。實惟吳人。長子道終。卜葬嬴博。夫遭時而制。不遠遷徙。魂氣所之。不繫邱壠。於是公乃爲辭。昭告先考。然後卜定宅兆。十月既望。粵翌日己酉。葬我夫人黃氏于此高原。雒陽東界關亭之阿。蔡中郎集

碑中兼敍妻德及卒年例

郎中馬江碑。夫人窻句曹氏。終溫淑慎。咸曰女師。年五十五。建寧三年十二月卒。隸釋

不日者略之。非定例。

碑末附載妻卒年月日例

金鄉長侯成碑末。夫人呂延熹七年歲在甲辰十一月三日庚午。遭疾終。隸釋

碑稱侯成以建寧二年四月二日卒。碑末大書一行。夫人云云。當是夫人卒後合葬。書于碑末。與馬君碑同時葬。同書于碑不同。

婦人墓碑書氏書字例

太傅胡公夫人靈表。夫人編縣舊族章氏之季女也。字曰顯章。

蔡中郎集 胡夫人黃氏神
誥議郎胡夫人哀讚並同

自周以前。姓氏各別。秦漢以後。姓氏不分。諸碑書氏不書姓。書姓不書氏。常例也。隸續司農劉夫人碑云。姓劉氏。書姓又書氏。蓋本史記五帝紀。姓妣氏。姓子氏。姓姬氏之文。古人文字重複。往往如此。然不可爲例。說文氏。巴蜀名山。岸脅之自旁。箸欲落墮者曰氏。氏崩聲聞數百里。象形。一聲揚雄賦。響若氏隕。段氏注曰。古經傳氏與是多通用。大戴禮。昆吾者衛氏也。以下六氏字皆是之假借。而漢書漢碑假氏爲是。不可枚數。故知姓氏字當作是。假借氏字爲之。是者分別之詞也。又說文女部。姚。虞舜尻姚虛。因目爲姓。媯。虞帝尻媯。因目爲氏。段注欲於氏下增姓字。云尋姓氏之禮。姓統於上。氏別於下。鄭駁五經異義曰。天子賜姓命氏。諸侯命族。族者。氏之別名也。姓者。所以統繫百世不別也。氏者。所以別子孫之所出。故世本之篇。言姓則在上。言氏則在下也。此由姓而氏之說也。旣別爲氏。則謂之氏姓。故風俗通潛夫論。皆以氏姓名篇。諸書多言氏姓。氏姓之見於經者。春秋隱九年。天王使南季來聘。穀梁傳曰。南。氏姓也。南爲逗。氏姓也。三字爲句。此氏姓之明文也。史記陳杞世家。舜爲庶人時。堯妻之二女。居於媯。媯。其後因爲氏姓。姓媯氏。五帝本紀曰。自黃帝至舜禹皆同姓。帝禹爲夏后而別氏姓。姓妣氏。

契爲商姓子氏。棄爲周姓姬氏。此皆氏姓之明文也。左傳曰：陳胡公不淫。故周賜之姓。使祀虞帝。賜之姓者。賜姓曰媯也。段令媯不爲姓。何以不賜姓。姚而賜姓媯乎。凡言賜姓者。先儒以爲有德者則復賜之祖姓。使紹其後。故后稷賜姓曰姬。四岳堯賜姓曰姜。董父舜賜姓曰董。秦大費賜姓曰嬴。皆予以祖姓也。其有賜姓而本非其祖姓者。如鄭氏駁異義云：炎帝姓姜。大暉之所賜也。黃帝姓姬。炎帝之所賜也。是炎帝黃帝之先。固自有姓。而炎帝黃帝之姜姬。實爲氏姓之朔始。夏之姓姁。商之姓子。亦同。然則單言姓者。未嘗不爲氏姓。單言氏者。其後以爲姓。古則然矣。至於周則以三代以上之姓及氏姓爲昏姻不通之姓。而近本諸氏於官氏於事氏於王父字者。爲氏不爲姓。古今之不同也。案說文以姚爲舜姓。媯爲舜氏。左氏隱八年傳：天子建德。因生以賜姓。胙之土而命之氏。杜注：若舜生媯。納賜姓曰媯。封舜之後於陳。以所封之土命爲氏。舜後姓媯而氏曰陳。據此。是媯爲舜姓。與說文異。說文是也。據說文。姓氏各別。不得於氏下增姓字。喪服小記：復與書銘。婦人書姓與伯仲。如不知姓。則書氏。孔疏云：若妾有不知姓者。當稱氏矣。是姓氏不同之證。穀梁傳云：南氏姓也。傳意以南爲或氏。或姓。不敢遽定。故云氏姓。范寧謂氏以爲姓。非也。陳杞世家曰：其後因爲氏姓。此誤襲穀梁之文。段氏從之。非也。風俗通：無氏姓。篇潛夫論：所志氏姓。其首略敍曰：凡厥姓氏。皆出屬而不可勝紀也。然則氏姓猶言姓氏。倒文耳。豈得以證穀梁哉。今本史記五帝本紀：帝禹爲夏后。而別氏姓姁氏。別氏下不重姓字。段氏作別氏姓。

姓姬氏。不知所據何本。恐臆說也。總之姓氏對文則異。散文則通。日知錄曰。春秋有姜氏子氏。姜子皆姓而云氏是也。史記所云姓姬氏。姓子氏。姓姬氏。此古人文字重複處。不及說文分別姓氏。最爲明晰。段氏反據史記以增改說文。非也。顧氏棟高春秋大事表。引元史伯璿曰。三代以後。無所謂姓。只有氏而已。故後世但曰姓某氏。而不敢曰某姓某氏。蓋姓不可考。故但虛其姓於氏之上。而實其氏於下。亮哉言乎。案如史氏之言。當於姓上空一字。既不空字。則非虛其姓於氏之上。顧氏以爲然。非也。

書繼室例

漢交阯都尉胡夫人黃氏神誥。初都尉君娶於故豫州刺史卽黃君之姊。生太傅安樂侯。及卷令康而卒。繼室以夫人。生童紀。未齠而夭。夫人撫育遺孤。導以義方。蔡中郎集

陳君立曰。左傳妻稱繼室。皆非敵體。如聲子繼室也。而春秋家謂隱母爲賤。晉少姜卒。傳稱妾寵之喪。而齊侯請繼室于晉。卽繼少姜也。其非嫡夫人可知。繼室稱夫人。其昉於漢代乎。

有官職者妻得統稱夫人例

漢交阯都尉胡夫人黃氏神誥。夫人江陵黃氏之季女云云。蔡中郎集下同。

大傅安樂侯胡公夫人靈表。夫人編縣舊族章氏之季女也云云。

司徒袁公夫人馬氏靈表。維光和七年司徒袁公夫人馬氏薨云云。

議郎胡公夫人哀讚。議郎夫人趙氏字曰永姜云云。

周制天子有三夫人。諸侯之妻稱夫人。秦漢時三公稱公。其妻稱夫人。常例也。然子孫尊其先世。後進尊其鄉先生。不必三公亦稱公。不必夫人亦稱夫人。胡袁二公其妻稱夫人。此三公之妻稱夫人也。都尉議郎之妻亦稱夫人。此非三公之妻。亦得統稱夫人也。近世諸生之妻。及世族之婦。雖無官職。統稱孺人。蓋與此同。

敍婦人家世例

漢交阯都尉胡夫人黃氏神誥。夫人江陵黃氏之季女。其先出自伯翳。別封于黃。以國氏焉。高祖父汝南太守。曾祖父延城大尹。祖父番禺令。父以主簿嘗證太守事。奉明君以立臣節。漢南之士。以爲美談。

蔡中郎集

同下

司徒袁公夫人馬氏靈表。夫人右扶風平陵人也。曾祖中水侯。祖將作大匠。考南郡太守中水侯。弟伏波將軍。女在淑媛。作合孝明。誕生孝章。婚姻帝室。

婦人墓碑敍先世。常例也。袁夫人靈表。伏波將軍之女。於夫人爲祖姑。而亦敍之者。以其爲太后。故大

書以示重。又此表不敘子孫。隸釋李翊夫人碑亦不叙子孫。蓋婦人立碑有二。或婦人先卒。其夫尚在。其子孫之數不可豫定。故不書。或夫已卒而婦人別葬。其子孫已載其夫墓碑。故亦不書。上文胡夫人神誥。書其所生子者。將敘其撫育前室子。故書下文子立母碑例。袁夫人碑銘。書其所生子者。碑爲其子立。故書。女立母碑例。胡夫人靈表。書其所生子者。將敘其諸子早卒。女爲立碑。故書。

書子孫官爵例

國三老袁良碑。時元子光。博平令。中子騰。尚書郎。少子璋。謁者。詔書壁□□可父事。羣司以君父子俱列三臺云云。於是厥孫衛尉滂。司徒掾宏。闕適刊石作銘云云。隸釋

太尉楊震碑。長子牧。富波侯相。次讓。趙常山相。次秉。實能纘脩。復登上司。陪陵京師。次奉。黃門侍郎。牧子統。金城太守。沛相。讓子著。高陽令。同上

書弟及子官爵事蹟例

綏民校尉熊君碑。君同產弟望季公。名望。字季公。質性忼慨。史魚之直。吏功曹列掾督郵都梁長。早終。君長子

再孝存。名再。字孝存。姿操敦良。耽志好學。博覽雅藝。□□曹列□□三奏辟召於州終。隸釋

後漢書蔡邕傳注引邕祖攜碑云長子棧字伯直處俗孤黨不協于時垂翼華髮人爵不升年五十三卒諡法曰清白守節曰貞純行不差曰定此子先父卒於其父碑中詳載其子事蹟者但未及兄弟耳附錄於此

書孤嗣例

文範先生陳仲弓銘孤嗣紀云云

蔡中郎集

隸釋司隸從事郭究碑外黃令高彪碑並稱孤嗣按孤嗣猶孤子也變子言嗣者子兼男女之稱嗣則專指男也其實漢人亦稱孤子漢書嚴助傳孤子靚號是也曲禮孤子當室冠衣不純采鄭注謂年未三十者三十壯有室有代親之端不爲孤也深衣注亦云三十以下無父稱孤案鄭義本諸孟子王制然漢人撰文長幼俱得稱孤今世亦然

該餘叢攷曰今人父亡稱孤子母亡稱哀子按古禮父母喪皆稱哀子不特爲母亡也孟子幼而無父曰孤故父喪亦稱孤子如營康與山巨源絕交書少加孤

露又趙彥深見母自陳幼小孤露此皆以無父言然雜記諸侯之禮他國弔含襚皆對曰孤某須矣曲禮諸侯在喪曰適子孤左傳列國有凶稱孤在喪也有凶也皆通乎父母之喪言之非專係乎父也宋書巴陵王休若傳謝沈居母喪自稱孤子袁粲傳粲丁母憂謂諸將曰孤子受先帝顧託本以死報今日當與楮護軍同死社稷是母喪亦稱孤子矣六朝人每言偏孤梁書韋叟父早卒叟少而偏孤事母以孝聞此父先亡者梁書裴子野生而偏孤爲祖母所養魏書裴延儻少偏孤事後母以孝聞此母先亡者謝貞傳貞以母憂毀瘠將歿謂姚察曰孤子疊禍所集將隨灰壤時貞父已先亡此則父母俱亡者可見孤字之義本無定屬今世以孤屬父以哀屬母本於司馬溫公書儀按開元禮四品以下卜宅兆泄卜者命曰孤子某云云注曰今儀父及祖稱孤子孤孫母及祖母稱哀子哀孫則

孤哀之分稱實始於唐不自溫公始宋政和禮虞祭至大小祥祭祝文父曰孤子母曰哀子亦不獨載之溫公書儀也

碑文有稱孝嗣者安平相孫根碑有稱孝孤者北軍中

侯郭仲奇碑有稱孝子者北海相景君銘從事武梁碑

士虞禮孝子某特性少牢禮孝孫某鄭注士虞禮曰喪祭稱哀稱孝者吉祭案雜記祭稱孝子孝孫喪稱哀子哀孫正義

祭吉祭也謂自卒哭以後之祭也吉則申孝之心故祝辭云孝也喪凶祭謂自虞以前祭也喪則痛慕未申故稱哀也審是則凡稱孝者皆已葬之詞

有稱遺孤者博陵太守孔彪碑故民吳仲

山碑有稱咳孤者淳于長夏承碑

咳孤即孩孤說文咳小兒笑也孩古文咳從子內則父執子之右手咳而名之釋文本作孩云孩木又作咳孝經聖治章疏引內則作孩與釋文合阮太傅禮記校勘記曰惠

校宋本咳作孩通典六十八引亦作孩然則咳孩一也史記扁鵲傳不能若是而欲生之曾不可以告咳嬰之兒終日亦作咳字

有稱孤生者慎令劉脩碑

以上諸碑並見隸釋

又有單稱孤者

司空文烈侯楊公碑朱公叔墳前石碑議郎胡公夫人哀讚又有稱孤而繫以數者太尉橋公廟碑

碑

三孤 以上諸碑並見蔡中郎集

又有單稱息者司隸校尉魯峻碑

隸釋息即子也趙策老臣賤息舒祺後漢書光武十王列傳東海恭王彊臨命上疏謝曰息政小人也許君宗寅曰息兼男女之

稱東觀漢記此蓋我子息也是以子爲息前漢高紀臣有息女願爲箕帚妾是以女爲息恭冕曰梁武帝長安有狹邪行大息組網縑中息佩陸離小息尙清綺總轡游南皮此亦女稱息者

書哀子例

司徒袁公夫人馬氏碑銘哀子懿達仁達云云

蔡中郎集

儀禮士喪禮。筮者命曰。哀子某。爲其父某甫筮宅。洎卜命曰。哀子某來日卜葬其父某甫。士虞禮。始虞用柔日。曰。哀子某。哀顯相。夙興夜處不寧。再虞三虞如初。將且而祔。則薦卒辭曰。哀子某來日某。隋祔爾于爾皇祖某甫。尙饗。女子曰。皇祖妣某氏。饗辭曰。哀子某。圭爲而哀薦之饗。鄭注。喪祭稱哀。案此則哀者未祔以前之稱。考妣同之。故漢人據以入碑文。今世母歿稱哀。母存不得稱哀。乃唐開元以後之制。詳見前注。

書無子例

元文先生李子材銘。初娶配出。後配未字。年既五十。苗胤不嗣。蔡中郎集

公卿大夫爲卑官處士立碑例

陳太邱碑。河南尹种府君。追歎功德。述錄高行。重部大掾。以成斯銘。蔡中郎集

貞節先生范史雲碑。太尉張公。兖州陳君。陳留太守淳于君。外黃令劉君。謀於耆舊。刊石樹銘。同上

二碑於立碑人書姓不書名。尊之也。陳君以下。以張太尉故。同不書名。其實郡邑之長書名也。

邑長爲邑人立碑例

孝廉柳敏碑。建寧元年。縣長同歲。榘爲屬國趙臺公。憤然念素帛之義。其二年十月甲子。爲君立碑。隸釋

隸釋曰。柳君以本初元年死。後二十三年。縣令趙臺念其墓無碑識。故爲立石。

父母爲子立碑例

冀州從事郭君碑。哀哀考妣。追惟實靈。卜商號咷。喪子失明。金石錄

生稱考妣。今所不用。已見敍。

戚伯著碑。父哀母悲。傷其□絕。隸釋

僚友立碑例

敦煌長史武斑碑。於是金鄉長河間高陽史恢等。追惟昔日同歲郎署。故□石銘碑。碑末尙書丞沛國蕭

曹芝云云。隸釋

隸釋曰。漢碑多門生故吏所立。至於同舍爲之者。唯武斑及柳敏兩碑。日知錄曰。今人以同舉爲同年。漢人已。有之。後漢書李固傳云。有同歲生得罪於冀。風俗通云。南陽五世公爲廣漢太守。與司徒長史段遼叔同歲。又云。與東萊太守蔡伯起同歲。又云。蕭令吳斌與司徒韓演同歲。三國志魏武帝紀云。公

與韓遂父同歲孝廉同歲卽今之同年。

姻戚立碑例

堂邑令費鳳碑。夫人元弟故□□□守卜膺追而誄之云云。

隸釋 金石錄刪節、無故字以下五字。

費鳳別碑。

金石錄作費君碑陰。

君舅家中孫甘陵石勳字子才載馳載驅來奔于喪庭不堪哀且思敍詩之一篇云云。

同上 金石錄刪節作君舅家中孫甘陵石勳字子才所述。

同上 金石錄刪節作君舅家中孫甘陵石勳字子才所述。

子立父碑例

司空文烈侯楊公碑。其孤彪敢儀古式。昭銘景烈。銘曰天鑒有漢云云。乃及伊公云云。

蔡中郎集

序文稱公。銘辭稱伊公。碑雖其子所立。而辭則撰人之稱。

文範先生陳仲弓碑。孤嗣紀銜恤在疚。遂宅兆域。宜有銘勒表墳墓。銘曰於熙文考云云。

同上

序文稱君。稱先生。銘辭稱文考。又稱君。序文則撰人之稱。銘則代其子稱之也。文考二字。今人宜避。見敍下烈考同。

中常侍樊安碑。嗣子遷。實以幼弱。夙敍王爵。而喪所天。禮備復位。以延熹三年冬十有一月。自上蒸祭。乃尋惟烈考恭脩之懿。勒之碑石。俾不失墜。古文施

鴻臚陳君碑。有子曰羣。追惟蓼莪罔極之思。乃與邦彥碩老。咨所以計功稱伐。銘贊之義。遂樹斯石。用監

于後。同上

丹楊太守郭旻碑。諸子曷仰。三載禮闕。迺羣相與刻石勒銘。金石錄

司隸校尉魯峻碑。息叡不才。弱冠而孤。承堂弗構。斲薪弗何。悲蓼莪同之不報。痛昊天。之靡嘉。類企有紀。

能不嘯薈。刊石敍哀。隸釋

司隸從事郭究碑。孤嗣叫號。涕零如雨。敢慕衛惺。讚先之義。乃伐石興碑。以旌厥魂。同上

以上五碑。皆子稱其父之詞。

子立母碑例

司徒袁公夫人馬氏碑銘。維光和七年。司徒袁公夫人馬氏薨。其十一月葬。哀子懿達。仁達。銜恤哀痛。靡

所寫懷。乃撰錄母氏之德履。示公之門人。覩文感義。采石於南山。謔之羣儒。假貞石以書焉。蔡中郎集

孫立祖碑例

國三老袁良碑。於是厥孫衛尉滂。司徒掾宏。闕乃刊石作銘。其辭曰。飛清邈紛。其厲云云。隸釋下同

淳于長夏承碑。咳孤憤泣。忉怛傷摧。勒銘金石。惟以告哀。其辭曰。於穆皇祖。天挺應期云云。

梁相費汎碑。適孫均。感奚斯之義。刊銘元石。旌勸厥美。俾覽焉。其辭曰。穆穆顯祖。厥德懿鑠云云。

袁良碑。撰文者之詞。夏承費汎碑。卽其孫之詞。皇祖二字宜避見。敍祭法。顯考廟。注。顯明也。正義。顯考廟者。高祖也。顯明高祖居四廟。取上。故以高祖目之。案費汎碑。稱顯祖者。自高祖至考。皆得以顯明尊稱之。今世猶然。

女立父碑例

先生郭輔碑。其季女明文。潁川之夫人也。感惟考妣克昌之德。登山采石。致于墓道。邑人縉紳。刻石作歌。

隸釋

水經注曰。碑無年號。不知何代人。集古錄曰。碑以如爲。而及用鄉鄰字。與婁壽碑同。蓋漢人如此。隸釋

曰碑有兩昭字。晉人所諱。疑是魏刻。案碑有昭字。無以定其爲魏刻。今從歐陽氏。水經注清水篇云。清水南道側有二石樓。題言蜀郡太守姓王。字子雅。南陽西鄂人。有三女無男。而家累千金。父歿當葬。女自相謂曰。先君生我姊妹。無男兄弟。今當安神元宅。翳靈后土。冥冥絕後。何以彰吾君之德。各出錢五百萬。一女築墓。二女建樓。以表孝思。案子立父碑。常例也。若無子女。亦得立碑。王子雅女築石樓費至千萬。侈已極矣。其文當卽刊於石樓柱壁。是亦碑類。因附錄之。

又沔水上云。晉水又東。逕七女冢。元嘉六年大水填崩。得一磚刻云。項氏伯無子。七女造椰。世

人疑是項伯冢。案此冢無以定其爲射陽項伯之冢。且其文太略。不可爲例。

女立母碑例

太傅胡公夫人靈表。夫人生五男。長曰整。伯齊。次曰千億。叔韡。次曰寧。穉威。次曰頌。季叡。皆早卽世。元女金盈。追慕永思。遂立斯表。鐫著堅珉。蔡中郎集

子立母碑。常例也。女立母碑。必夫人無子。或有子已故。故碑文特表出之。

碑文五男。而故者四人。其存者蓋幼。

弟立兄碑例

郎中鄭固碑。琦瑤延目爲至。惠不紀。則鐘鼎奚銘。昔姬□□武。弟述其兄。綜闕行於蔑陋。猷曷敢忘。乃刊

石目旌遺芳隸釋

王氏懷祖讀書雜誌載此碑文云昔姬公武句弟述其兄句綜口口口口句行句於蔑陋句猷曷敢忘

乃刊石句目旌遺芳句於蔑陋者於音烏歎詞也蔑陋謂鄙小也鄭注君爽云蔑小也高注淮南脩務篇云陋鄙小也漢書韋元成傳

云於蔑小子與此於蔑陋同義兄行忘芳為韻兄讀若荒行讀若杭隸辨以行於蔑陋四字為句則既失其義而又失其韻矣

弟及子同立碑例

慎令劉脩碑二弟龍純變哀孔懷孤生雋協郃長號思慕立此碑銘隸釋

子吏門人同立碑例

太尉橋公廟碑三孤故臣門人相與述公言行云云銘曰光光烈考云云蔡中郎集

廟碑入墓碑例者其例從同又以類相附後不更見子吏門人同立碑而銘詞稱烈考從其親者言也然今時宜避

門生爲師之祖父立碑例

太尉楊震碑。長子牧。牧子統。統之門人汝南陳熾等。緣在三義一。頗有清廟。故敢慕奚斯之追述。樹元石

于墳道。隸釋

門生爲師之子弟立碑例

童子逢盛碑。年十有二。沒而不行。於是門生東武孫理。下密王升等。感激三成。一列同義。故共刊石。敘述

才美。碑陰五官掾崔孟祖云云。右縣中士大夫高密徐承興祖云云。右家門生。隸釋

隸釋曰。縣中士大夫。其父黨也。故不名是也。案盛乃童子。必無門生。碑稱門生。碑陰稱家門生。必是其

父門生。漢人門生之稱。凡對其師家人言之皆然。

父子同塋立碑例

郎中鄭固碑。先是君大男孟子。有楊烏之才。年七歲而夭。故建口共墳。配食斯壇。且慰考妣之心。隸釋

錢氏大昕金石文跋尾曰。喪服傳。不滿八載以下爲無服之殤。鄭君長男孟子。七歲而夭。乃建墳與固配食。此禮之過而失其中者。案錢氏所言是也。然可爲父子同塋立碑之例。

兄弟同塋立碑例

郎中馬江碑。君中弟字文緒。位主簿督郵。志行闕。期落落自有大節。年卅二。早世短折。故塋迫芒。同兆告。

斯土。隸釋

隸釋曰：馬君元嘉三年卒。建寧三年夫人曹氏卒。碑文見前。相去十七年。又載其弟文緒。年三十二早世。當

是因夫人卜兆。以馬君共塋。又同時改厝其季。故作碑併言之。石有斷缺。不能詳攷。其云東看祖禰。西

瞻舊廬。可見其瘞以昭穆也。隸續。司隸校尉楊淮碑云。故司隸校尉楊君厥諱淮。字伯邳。舉孝廉。尚

書侍郎。上蔡雜陽令。將軍長史。任城金城河東山陽太守。御史中丞。□爲尚書尚書令。司隸校尉。將作

大匠。河南尹。伯邳從弟諱弼。字穎伯。舉孝廉。西鄂長。伯母憂去官。復舉孝廉。尚書侍郎。遷注丞。冀州刺

史。大醫令。下邳相。元弟功德卒盛。當究三事。不幸早隕。國喪名臣。州里去覆。二君清頌。約身自守。俱大

司隸孟文之元孫也。黃門同郡。卞玉。字子珪。以熹平二年二月廿一日。謁歸過此。追述勒銘。故財表

紀。碑文案碑題楊淮。而兼敘其從弟弼。又稱弼功德卒盛。而不及淮。爲淮立碑。而詳略互異。此例之變也。當是淮弼二人共葬一塋。因共立一碑。而淮爲弼兄。遂題爲淮。其實因弼立也。雜例中有兩人共立

一碑。非以表墓。故此碑附錄於此。

婦祔姑墓例

太傅安樂侯胡公夫人靈表。建寧三年薨。夫人之存也。契闊中饋。婉孌供養。依生奉仁。紹述雅意。其閏月附于太夫人窀穸于茲地。蔡中郎集

孫祔祖墓例

交阯都尉胡夫人黃氏神誥。建寧二年。薨于太傅府。是月辛酉。公之季子陳留太守碩。卒于雒陽左池里舍。十月既望。粵翌日己酉。葬我夫人黃氏。及陳留太守碩。于此高原雒陽東界關亭之阿。同上

公謂胡廣。夫人乃廣母。碩乃廣子。夫人之孫。此孫祔祖母墓也。其孫祔祖父。書法亦同。故特著爲例。碩稱名者。以其祔祖母。又對其父稱之。禮所云父前子名也。

碑敍首總敍立碑人例

山陽太守祝睦後碑。故吏王堂等竊聞下有述上之功。臣有敍君之德。云云。集古錄乃相與刊勒金石。隸釋

碑中敍立碑人爵里姓名例

太尉橋公碑。於是故吏司徒博陵崔烈、廷尉河南吳整等，乃共勒嘉石，永昭芳烈。

蔡中郎集下同

太傅胡公碑。掾太原王允、鴈門畢整、扶風曾宙、潁川殷歷等，相與累次德行，撰舉功勳，刊之于碑。

又一碑云，故吏濟陽

池喜感公之義，乃樹石作頌。又一碑云，故吏司徒許詡等論集行跡，銘諸宛炎。

太尉汝南李公碑。故吏潁川太守張溫等，刊石立碑，德載不泯。

太守胡公碑。於時陳留主簿高吉、蔡軫等，咸以郡選充備官屬，遂樹碑作銘，以表令德。

彭城姜伯淮碑。弟子陳留申屠蟠等，乃建碑於墓。

此例甚多，中郎集外，不復詳引。其有渾紱立碑人，不書姓名者，太尉楊公二碑。

楊秉碑云：於是門人學徒，相與刊石樹碑。楊賜碑云：惟我

下流，二三小臣，紀公勳績，刊石立銘。蔡中郎集下同。

陳留太守胡公碑。

碑云：於是遐邇縉紳，爰暨門人，相與歎述君德，追痛不實，嗟我明哲，如何勿銘。

郭有道林宗碑。

碑云：凡我四方同好之人，永懷哀悼，於是

建碑表墓。

昭銘景行，翟先生碑。

碑云：於是鄉黨乃相與登山伐石而勒銘。

汝南周巨勝碑。

碑云：遐邇歎悼，痛心失圖，乃相與建碑勒銘，以旌休美。金石錄：廷尉仲定碑，平輿令薛君碑，隸釋：鄭令景君闕銘，議郎元賓、荊州刺史

度，尚金鄉長侯成、小黃門謙敏、渡儀令衡立諸碑略同。

附錄於此，不別爲例。

碑中渾敍立碑人碑陰詳載姓名例

泰山都尉孔宙碑。於是故吏門人。乃共陟名山采嘉石。碑陰門生鉅鹿癭陶張雲字子平云云。隸釋下同

繁陽令楊君碑。故吏臣隸。適共追錄厥勳。鐫石示後。碑陰故功曹史闕。故功曹史成功豫伯舉云云。

高陽令楊著碑。門徒小子。喪茲師範。故樹斯石。以昭厥勳。碑陰□□孫甫□鉅鹿時稚明云云。

吉成侯州輔碑。於是鄉人姻族。乃相與刊石樹碑。碑陰漢陽太守闕。故京兆尹延篤叔堅云云。

凡碑陰書立碑人爵里姓名。五者皆備。隸釋沛相楊統碑陰。懷陵圜令相蔣禧。字武仲。博陵太守孔彪碑陰。司徒掾博陵安平崔烈。字威考。是也。孔宙諸碑。五者不備。文有詳略。無義例也。其有先書姓。次

書爵。次書名。都鄉孝子嚴舉碑陰。向主吏諱曼云云。楊督郵諱鎮云云。楊侯同諱龐云云。趙掾諱護云

云是也。隸續曰。鼎其姓於吏職之上。而以諱挈其名。漢碑他無此式。

碑中渾敍立碑人碑末夾注姓名例

衛尉衛方碑。於是海內門生故吏□□采嘉石。樹靈碑。碑末夾注門生平原樂陵朱登字仲。隸釋

碑中敍首立碑人碑陰敍同立碑人復書首立碑人例

沛相楊統碑故吏戴條等適鑄石立碑碑陰故□□□郎中令□載□字叔□故吏懷陵圉令相蔣臈字

武仲云云隸釋

博陵太守孔彪碑□吏崔□□□王沛等乃刊斯石碑陰故吏司徒掾博陵安平崔烈字威考故吏齊□

博陵安平崔恢字行孫故吏乘氏令博陵安平王沛字公豫故吏司空掾博陵安國劉惠字伯桓云云同上

碑陰載立碑人姓名同郡不書郡同縣不書縣例

元儒先生婁壽碑陰故五官掾婁□伯故守長史掾夏光淵云云隸釋

吉成侯州輔碑陰漢陽太守下故京兆尹延篤叔堅故東平相溫貢顯宗云云同上

司隸校尉魯峻斷碑陰闕延上闕文臺郗仲軍彭城徐文達汝南袁彥和翟公勝仲孝安云云隸釋

婁壽碑云南陽隆人魯峻碑云山陽昌邑人州輔碑其郡邑刊闕隸釋曰婁壽碑陰可見者五十四人漫滅者四人其稱南郡汝南者二人餘蓋南陽人州輔碑陰自漢陽太守而下四十有九人其八人緝

邑曰冠軍、曰宛、曰章陵、曰新野、曰比陽、曰魯陽、皆南陽之邑。餘人唯延篤有傳。乃南陽攀人，則不稱邑者。攀之人也。碑云：鄉人姻族相與刊石，則又知輔爲攀人也。魯峻斷碑陰九十有一人書姓名而不名。惟徐袁二人有郡。婁壽碑陰不出郡者，皆同郡人也。州輔碑陰不出縣者，皆同縣人也。此殘碑貫彭城、汝南者各一人，則其餘皆山陽人也。

碑陰人名後各總標郡縣名例

太尉郭禧碑陰於立碑人姓名後云右河南、右河內郡、右宏農郡、右扶風郡。

金石錄

太尉劉寬碑陰門生名後云右河南郡、右河內郡、右河東郡、右京兆、右扶風郡、右馮翊郡、右南陽□、右□

川郡、右□國、右陳留郡。

隸續

右總標郡名。劉寬碑陰王曜以下有爵秩者，皆特書爵郡縣姓名字。

碑云：故華陰令相國別部司馬漢陽河陽王曜孝起云云。

左宮以

下無爵秩者，各書縣姓名字。

碑云：河南左宮叔舉云云。

而總標郡名，有爵詳，無爵略，又常例中之變例。

故吏應酬殘題名，故吏應酬云云，又一行右郟故吏舒苗云云，又一行右江原。

隸釋

右總標縣名。

隸釋曰、郫江原皆隸蜀郡、此蓋蜀郡太守碑陰。

漢石例卷三

墓碑例

書故吏故民例

泰山都尉孔宙碑陰。故吏北海都昌逢祈字伯熹云云。故民泰山費淳于黨字季□云云。

隸釋

案統言則曰故吏。析言則有掾。有史。有令史。分以列曹。戶曹。

掾見濟陰太守孟郁修堯廟碑。華山亭碑。漂陽長潘乾校官碑。邵陽令曹全碑。史見孟郁修堯廟碑。孔廟置守

廟百石孔蘇碑。華山亭碑。樊毅修華嶽廟碑。淮源廟碑。潘乾碑。巴郡太守張納碑。堂邑令費鳳碑。學師宋恩題名。祀三公山碑。馮煥殘碑。少室石闕銘。開母廟石闕銘。陳德碑。竹葉碑。令史見張納碑。奏曹。掾見蒼頡廟碑。史見張

掾未見。史見張納碑。曹。掾見張納碑。史見張納碑。宋恩題名曹。宋恩題名竹葉碑。法曹。掾見張納碑。史見張納碑。尉曹。掾見張納碑。都鄉正衛彈。賊曹。掾見中部碑。史見張納碑。宋恩題名曹。

案武氏石室題字。單稱賊曹。未分掾史。宛令李孟初神祠碑。有賊捕掾。即賊曹掾。蜀郡造橋碑。有荷賊曹掾。隸釋於荷字未詳。韓勅造孔廟禮器碑。有相中賊史。謂相府中賊曹史。決曹。掾未見。史見張

題名馮煥碑。令。金曹。掾見張納碑。中部碑。史見張納碑。宋恩題名曹全碑。中部碑。倉曹。掾見蒼頡廟碑。史見張案後漢書百官志。公府掾十二曹。其

十已見碑文。惟西曹東曹罕見耳。公府者，太尉司徒司空三公之府。總稱府掾。元儒先生妻壽碑。吉成侯州輔碑。析稱太

尉掾。靈臺碑。魯相韓勅造孔廟禮器碑。華嶽廟殘碑。司徒掾。靈臺碑。仙人唐公房碑。司空掾。華嶽廟殘碑。此十曹外，又有祠曹。掾見孔蘇碑。史未見。議曹。掾見潘乾碑。張納碑。呂國題名。

史見蒼頡廟碑。曹。掾史並見。集曹。掾見張納碑。蒼頡廟碑。史見張納碑。供曹。掾史並見。華山亭碑。比曹。掾見張納碑。史見張納碑。宋恩題名。獻曹。掾未見。史見張納碑。塞

曹。掾未見。史見曹全碑。宋恩題名。水曹。掾未見。史見宋恩題名。廣漢太守江堰碑。客曹。掾未見。史見馮煥碑。士曹。司空孔扶碑。單言士曹。未分掾。史令史見馮煥碑。不見於志。案志

戶曹主民戶祠祀農桑祠。曹即戶曹。奏曹主奏議事。議曹即奏曹。尉曹主卒徒轉運事。漕曹即尉曹。倉

曹主倉穀事。穀曹即倉曹。志又云：將軍其職吏部集各一人。總知營事。集曹即部集。又云：客曹尚書主

外國夷狄事。則客曹掾史即尚書屬吏。繫以所屬之官也。酸棗令劉熊碑。郡曹史郡列掾。韓勅造禮器碑。相史。蒼頡廟碑。少府史。唐公房碑。太守史。劉熊碑。曹全碑。郡曹史曹

全碑。將軍令史。郭究碑。額司隸從事。並繫以官。志又云：公府掾比古元士三命。或曰：漢初掾史辟皆上言之。故有秩比命士。其所不

言則為百石屬。是士曹乃諸曹中之聞於朝比命士者。別於不命。故曰士曹。惟供曹比曹。獻曹塞曹水曹。無文以明之。志又云：署諸曹事掾史屬二十四人。以十二曹計之。每曹掾史各一人。而漢碑掾則有

右金曹。右賊曹。中部碑。史則有左戶曹。右戶曹。左賊曹。竹葉碑。右賊曹。中部碑。左決曹。右決曹。作葉碑。左金曹。張納碑。

右金曹張納碑、左倉曹張納碑、中倉曹中部碑、左漕曹、右漕曹、右集曹、右兵曹張納碑、外兵曹馮煥碑。是每曹

掾史各四人。有中外左右之殊。十二曹當有九十六人。與志文不合。疑漢末不能如制。碑文又有祠祀

掾無極山碑、白石神君碑、鑿廟掾少室石闕銘、開母廟石闕銘鑿掾同。當即戶曹。門下議掾史掾見曹全碑、史見北海相景君碑、靈臺碑門下議生同。當即奏曹。又有郵

書掾曹全碑。案志、法曹主郵驛科程事。則郵書即法曹志。又於司隸校尉云。從事史十二人。考諸漢碑。司

隸中都官從事北軍中候郭仲奇碑。志云。都官從事此云中都官從事。豈亦如督郵五部歟。與志同。河隄從事吉成侯州輔碑。與志異。又兗州從事韓勅碑、冀州刺史王純碑。

豫州從事韓勅碑。益州從事唐公房碑、張納碑淳于長夏承碑。荊州從事桂陽太守周憬功勳銘、冀州從事張表碑。即志所云郡國從

事。志又云。假佐二十五人。考漢碑有功曹書佐蒼頡廟碑。與志同。又有決曹書佐沛相楊統碑。案志於太尉下云。決

曹主罪法事。於司隸校尉下云。都官從事主察舉百官犯法者。則決曹書佐。當即都官書佐。又有單稱

從事靈臺碑、鄒季宣碑樊毅修華嶽碑、周懷功勳銘並有行事。當即從事而異名。單稱書佐北海相景君碑、文不備也。別有治中從事王純碑、志云。州刺

史功曹從事為治中從事是也。其郡縣掾史。志云。凡郡國歲盡遣吏上計。又云。有功曹史。五官掾。五部

督郵曹掾門亭長。主記室史。諸曹各有書佐幹。注引漢官。員吏中有案獄仁恕。監津渠漕水掾。文學守

助掾。循行幹小史。考漢碑有上計掾史。掾見張納碑。夏承碑。掾史並見南陽太守秦頡碑。功曹史。淮南廟碑。張納碑。繁陽令楊君碑。宋恩題名。李孟初神祠碑。蒼頡廟碑。陳德碑。竹葉碑。曹

全碑。案樊毅修華嶽廟碑。劉熊碑。華山廟殘碑。蒼頡廟碑。武氏石室五官掾。靈臺碑。淮南廟碑。博陵太守孔彪碑。呂國題名。祀三

題宇。曹全碑。亦單稱功曹。楊君碑。又兼稱處士功曹。疑皆指功曹史。公山碑。少室石闕銘。開母廟石闕銘。蒼頡廟碑。武氏

石室題宇。劉熊碑。周憚銘。張納東部督郵。唐公南部督郵。房碑。周憚銘。張納中部督郵。張納碑。北海相

五百掾。蓋五官之譌。景君碑。竹葉碑。北部督郵。竹葉碑。靈臺碑。都鄉

題宇。曹全碑。單亭長。魯王墓前石人刻字。案公府以下正門俱有亭長。此亭長主記室。淮南廟碑。潘乾碑。費鳳碑。中部碑。蒼

稱督郵。文不備。屬郡國。故列於此。又案志。亭有亭長。此鄉亭之長。與門長別。主記室。頡廟碑記。史。鄭季宣碑記。室。史。費鳳碑。

主史。疑並同。又靈臺碑陰。鄭季主記書佐。鄭季皆與志合。又有直事干。鄭季諸曹干。司馬干。即幹。漢人借干為幹。王氏昶金

有主吏。未知即主史否。宣碑。皆與志合。又有直事干。鄭季諸曹干。司馬干。即幹。漢人借干為幹。王氏昶金

史記。歷書作干。古蓋省為干是也。後漢書。欒巴傳。雖幹吏卑末。皆課令習讀。注。幹。府吏之類也。晉令。諸郡國不滿五千以下。置幹吏二

人。郡縣皆有幹。幹。猶主也。北海相景君銘。幹作午。隸釋曰。百官志。載郡縣吏屬。自曹掾之下。有書佐。有循行。有幹。有小史。此碑故午

六人。在循行小史之間。隸文幹字其旁。張納即案獄仁恕。志注。引漢官。河南尹員吏案。獄仁恕三人。此云都水掾。

从。从干。或从。从。从午。午是幹字省文。張納即案獄仁恕。志注。引漢官。河南尹員吏案。獄仁恕三人。此云都水掾。

西嶽華。即監津渠漕水掾。都水。西漢時官名。東漢省。志於少府文學主事掾。張納即文學守助掾。脩行。北海相。景君碑。即循

山廟碑。下云。都水屬郡國。知都水。即此職。文學主事掾。張納即文學守助掾。脩行。北海相。景君碑。即循

行。金石錄曰。後漢書百官志注。河南尹官屬。有循行一百三十人。而督書職官志。州縣吏皆有循行。此碑作脩行。豈循脩字畫相類。

遂致訛謬邪。隸釋曰。循。循。隸法只爭一畫。書碑者好奇。從省借用。都氏穆金薤琳瑯曰。碑刻于漢。而後漢書舊皆傳錄。以脩為循。

傳錄之誤。趙氏不信碑本，而信漢書。且復引晉書爲證，不知晉書脩於唐，其亦曰循行，蓋仍漢書之誤。案趙氏洪氏從後漢書以循行爲正，都氏從碑文以脩行爲正，未知孰是。姑從趙洪。

小史

繁陽令楊君碑。北海相景君碑。夏堪碑。額相府小史。與此小

史同。但繫以官耳。

卽幹小史。與志亦合。然志但有主記室史。而碑文復有主記掾。

張納碑。著頡廟碑。

又張納碑既有主記

掾。復有錄事掾。

曹全碑亦有錄事掾。然不與主記掾並列。著頡廟碑復有錄事史。

既有文學主事掾。復有文學史。文學主事史。鄭季宣碑既有

主事書佐。復有門下書佐。

楊統碑。北海相景君碑。亦有門下書佐。然不與主記記室錄事諸書佐並列。繁陽令楊君碑。門下佐。卽門下書佐。

記室書佐。錄事書佐。既有直事

小史。復有門下小史。豈志不詳歟。抑漢末不能如制歟。志又云。凡縣諸曹。略如郡員。五官爲廷掾。鄉置

有秩。三老。游徼。考漢碑有廷掾。

祀三公山碑。少室開母廟石闕銘。

有有秩。

都鄉正衛彈碑。呂國題名有衡官有秩。蓋有秩兼爲衡官。

有三老。

武氏石室題字。楊信碑。額作縣三老。以

別於國三老也。

有游徼。同上。游徼亦名督盜賊。著頡廟碑有督盜賊。志云。游徼掌徼循禁司盜。盜是督盜賊。卽游徼。張納碑又有府後督盜賊。豈此職亦有前後左右耶。

與志文合。然武氏題字有游徼。

又有門下游徼。其爲同異。未可知也。又郡縣吏有將作掾史。

掾見華山亭碑。祀三公山碑。少室石闕銘。史見華山亭碑。帝堯碑守堯掾將作吏。卽將作掾。

道橋

掾。漢安長陳君開道碑。蜀郡造橋碑。

有南部道橋掾。似當以四境分職。

鑿市掾。

張納碑。武氏題字。曹全碑。市掾同。又靈臺碑。都市掾。官都卽都水掾。市卽鑿市掾。

教化史。

著頡廟碑。

皆不見於志。又有

行義掾。韓勅碑。北海相。景君碑行義同。仁德掾。無極山碑。孝義掾。宋恩題名。未知所掌之職。抑褒美之稱。今並無文明之。又學官屬

吏。有業掾。易掾。尚書掾。詩掾。春秋掾。議掾。文學掾。文學掾。學師宋。並不見於志。此則志文闕也。又諸

吏皆得稱門下。門下掾。華山亭碑。呂國題名。曹全碑。門下史。潘乾碑。繁陽令楊君碑。鄧季宣碑。費鳳碑。陳德碑。曹全碑。門下議掾。史。門下書佐。門下小史。見前

門下祭酒。曹全碑。祭酒非職名。蓋一曹之長。門下賊曹。費鳳碑。蒼頡廟碑。武氏題字。曹全碑。門下功曹。門下游徼。費鳳碑。蒼頡廟碑。武氏題字。門下督盜賊。北海相景君碑。

此則諸吏統稱。非別有職掌也。掾史之副名屬。亦名副。亦名佐。樊毅復華下民租田口算碑。掾臣條。屬臣淮。是名屬也。史長。鑿孔廟後碑有副掾。是名副也。少室石闕銘有廟佐。即廟掾之佐。開母廟石闕銘有將作掾。

佐。是名佐也。後漢書志云。東西曹掾。比四百石。餘掾比三百石。屬比二百石。注。引漢書音義。正曰。掾副曰屬是也。注又引漢官員吏中有佐。與此別。未即真者名守。孔龢碑守文學掾。婁壽碑守長史。掾。張納碑守屬是也。其待次未授職者名從。潘乾碑。張納碑。蒼頡廟碑

從掾位。呂國題名從史位。益州太守無名碑從史。漢書兒寬傳。顏師古注。從史者。但只隨官僚。不主文書是也。蜀郡造橋碑有從吏。為掾為史。未可知也。其稱從則同。亦稱待事。張納碑待事掾是也。蒼頡廟碑有持事。即待事之譌。其一人而居二職者名兼。郭子真宅舍

殘碑兼掾。史是也。歐趙洪三家。於諸員吏未嘗攷訂。因為辨析。附錄於此。其故民析言之。亦有義民。靈臺碑。藁長蔡洪碑。隸釋曰。

占籍者曰故民。素非所蒞曰義民。案此說非也。堂邑令費鳳碑有義民堂邑。誠忠。忠為所蒞而復民。韓勅碑。漢時凡除田租。舊役稱義民。蓋謂其為行義之民。帝堯殘碑有行義民。即義民也。但素非所蒞者。亦得統稱義民耳。皆曰復。故謂其民曰復民。前漢

文帝紀復晉陽中都民三歲租。後漢光武帝紀。建武十九年。復南頓田租。此復田租也。建武五年。詔復濟陽二年徭役。六年。改春陵鄉爲章陵縣。世世復徭役。此復徭役也。若田租徭役俱除。則但曰復前漢高祖紀十一年。令豐人徙關中者。皆復終身。令士卒從入蜀關中者。皆復終身。十二年。吏入蜀。漢定三秦者。皆世世復。晉義曰。復謂除其賦役是也。又除口筭亦曰復。樊毅有復華下民租田口筭碑是也。賤民。議民。蔡湛碑。金石錄曰。又民之無字者。以阿

挈其名爲字。與有字者相配。仲東阿東。

靈臺碑。碑又云。仲阿東。仲阿先。仲阿同。

劉奉阿奉。劉興阿興。

穀阮君神祠碑。隸釋曰。字其名而繫以阿。書石者欲其整齊而強

加之。猶今閭巷之婦。以阿挈其姓也。是也。並附錄。

書門生門童弟子不同例

泰山都尉孔宙碑陰。門生鉅鹿瘦陶張雲字子平云云。門童安平下博張忠字公直云云。弟子北海劇陸

暹字孟輔云云。隸釋

集古錄曰。親受業者爲弟子。轉相傳授者爲門生。隸釋曰。以久次相傳授曰門生。未冠曰門童。總而稱之亦曰門生。日知錄曰。後漢書賈逵傳。皆拜逵所造弟子及門生爲千乘王國郎。是弟子與門生爲二。漢人以受學者爲弟子。其依附名勢者爲門生。邳壽傳。時大將軍竇憲以外戚之寵。威傾天下。憲常使門生齋書詣壽。有所請託。楊彪傳。黃門令王甫使門生於京兆界。辜權官財物七千餘萬。憲外戚。甫奄

人也。安得有傳授之門生乎？又曰：南史所稱之門生，今之門下人也。宋書徐湛之傳：門生千餘人。皆三吳富人子。資質端妍，衣服鮮麗。每出入行游，塗巷盈滿。謝靈運傳：奴僮既衆，義故門生數百。南齊書劉懷珍傳：懷珍北州舊姓，門附殷積，啓上門生千人充宿衛。孝武大驚，其所執者，奔走僕隸之役。晉書劉隗傳：周嵩嫁女，門生斷道，斫傷二人。建康左尉赴變，又被斫。南史齊東昏侯紀：丹陽尹王志被驅急，狼狽步走，惟將二門生自隨。后妃傳：門生王清，與墓工始下插。劉瓛傳：游詣故人，惟一門生持胡牀隨後是也。其初至，皆入錢爲之。宋書顏竣傳：多假資禮，解爲門生。充朝滿野，殆將千計。梁書顧協傳：有門生始來事協，知其廉潔，不敢厚餉，止送錢二千。協怒，杖之二十。南史姚察傳：有門生送南布一端，花練一疋，察厲聲驅出是也。故南齊書謝超宗傳云：自從王永先。又云：門生王永先，謂之自從，以其異於在官之人。陳書沈洙傳：建康令沈孝軌，門生陳三兒，牒稱主人翁。顏氏家訓：亦以門生僮僕並稱。而宋書顧琛傳：尚書寺門有制，八座以下，門生隨入者各有差，不得雜以人士。其冗賤可知矣。劉昭傳：不私蓄門生。蓋所以矯時人之弊。陔餘叢考曰：漢時門生，本非弟子之稱。後漢書楊厚傳：門生上名錄者三千餘人。曰上名錄，則不必親受業，但習其學卽是也。鄭康成傳：康成沒，門生相與撰其問答諸弟子之詞，依論語爲鄭志，以弟子問答之詞，而門生撰述之。蓋如論語所謂門人受業于弟子者也。李固傳：固下獄，門生王調貫械，上書證其枉，及固死，陳屍於路。固弟子郭亮負鉢，乞收固屍。曰：門生曰弟子，又

可見門生之非弟子也。惟其不必親受業，但爲其學者，皆可稱門生。於是依勢趣利者，並不必以學問相師，而亦稱門生。蓋卽後世拜門生之陋習也。又曰：唐以後始有座主門生之稱。六朝時所謂門生，則非門弟子也。其時仕宦者，許各募部曲，謂之義從。其在門下親侍者，則謂之門生。如今門子之類。宋書王微嘗將門生兩三人入山采藥。南史庾子輿之官巴陵，病篤不肯入廨，因勸門生不許輒入城市。何敬容罷官後，起爲侍中，其舊時賓客門生，喧譁如舊，冀其復用。臧嚴爲武寧郡守，以數門生單車入境。北史崔彥精於醫，廣教門生，令多救療。此數者，以之移作門弟子，尙可通。至如沈慶之佐孝武起兵，元凶劭使慶之門生錢無忌齋書，使之解甲。慶之執以見孝武，薛安都降魏，大見禮重。至於門生，無不收敘。慶之安都皆武人，目不知書。若如後世受業弟子，安得有此。又謝靈運因祖父之業，奴僮旣衆，義故門生數百。鑿山後湖，功役無已，則并用之功役矣。王僧達爲吳郡守，西臺寺多富沙門，僧達遣主簿顧曠率門義劫寺，得數百萬。門生義義從也，則並用之劫掠矣。劉義宗坐門生杜德靈放橫打人，免官。德靈以姿色故，義宗寵之，則又取其姿媚矣。宋孝武責沈勃周旋門生，競受賄賂，少者至萬，多者千金。則并大收其賄賂矣。又徐湛之謀逆，謂范蔚宗曰：已報臧質，悉攜門生義故前來，故應得健兒數百，則并用之叛逆矣。合此數事以觀，則門生不過如僮僕之類，非受業弟子也。其與僮僕稍異者，僮僕則在私家，此蓋在官人役，與胥史同。顧琛傳：琛以宗人顧碩寄尙書張茂度門名，而私與碩同席坐，乃坐譴。

益可知門生者正如胥史之類也。然富人子弟多有爲之者。蓋其時仕宦皆世族。而寒人則無進身之路。惟此可以年資得官。故不惜身爲賤役。且有出財賄以爲之者。陸慧曉爲吏部尙書。王晏典選內外要職。多用門生。義故。慧曉不甚措意。王琨爲吏部。自公卿下至士大夫。例用兩門生。江夏王義恭。屬用二人。後復用有所屬。琨不許。此可以見當日規制也。顧亭林旣謂六朝門生與僉僕同。而謂其非在官之人。則未知門生有可入仕之路。不得謂非在官人也。許君宗寅曰。後漢書桓榮傳。顯宗幸太常府。令榮坐東南。設几杖。會榮門生數百人。又云。每大射。養老禮畢。輒引榮及弟子升堂執經。一曰門生。一曰弟子。是門生與弟子無別也。又牟長樓望各傳。所言門生。實卽弟子。顧氏趙氏皆不引。蓋亦難於置辨也。案門生弟子對文則別。散文則通。史傳所載甚多。不備錄。

書處士與德行好學不同例

酸棗令劉熊碑陰。處士宋口仲博云云。好學尹_闕云云。德行蘇倉子盈云云。_{隸釋}

釋

處士義見卷一。碑陰書處士有二例。韓勅造孔廟禮器碑。河南成皋蘇漢明二百其人處士。此以處士繫於姓名之下。又云處士魯劉靜子著。此以處士加於姓名之上。又有稱處士友者。見元儒先生婁壽碑。蓋壽之友也。隸釋曰。處士之後。有好學四十餘人。必泮官之後進。以處士爲丈人行者。其間有德

行一人。必是嘗貢孝察廉者。案後漢書和帝紀注引漢官儀曰：建初八年詔書辟士四科。一曰德行高妙。志節清白。是德行一人。乃儲以應辟者。非嘗貢孝察廉也。國語齊語管子曰：正月之朝。鄉長復事君親問焉。曰：於子之鄉。有居處好學。慈孝於父母。聰惠質仁。發聞於鄉里者。有則以告。是好學乃人材之目。非後進也。

書清白士與聘士不同例

高睽石室題名。清白士云云。娉士云云。

隸續
土
即士字

書清白士與書德行一也。後漢辟士四科。一曰德行高妙。志節清白。見前左雄傳。鄉部親民之吏。皆用儒

生。清白任從政者。傳論漢初詔舉賢良方正。州郡察孝廉秀才。中興以後。復增敦樸有道賢能直言獨行高節質直清白敦厚之屬是也。其以清白待辟見於史者。馮緄傳。弟允清白。蔡邕傳。父棧有清白行。

呂布傳。高順爲人清白。周澤傳。孫堪清白真正。樓望傳。操節清白。李邵傳。弟子麻清白有節是也。

漢以
清白

課士。亦以清白課吏。安帝紀。元初六年。詔選孝廉郎寬博有謀。清白行高者五十人。延光元年。詔舉刺史二千石。令長相清白愛利有益於人者是也。其居官清白見於史者。度尙傳。文陟。刺史張磐。以清白稱。朱暉傳。遷泰山太守。因上便宜。詔報曰。補公家之闕。不累清

白之素。斯善美之士也。楊震傳。轉涿郡太守。性公廉。不受私謁。子孫常蔬食步行。曰。使後世稱爲清。白吏子孫。謝該傳。少府孔融。上書薦之曰。竊見故公車司馬令謝該。清白異行。此以清白課吏之驗。聘士卽徵士。義見卷一。此聘士當是曾經徵辟而未就者。

義士及弟子統名諸生服義例

謁者景君碑陰。諸生服義者。義士北海劇張敏字公輔。弟子濟北荏平寧尊字伯尊云云。隸釋

金石錄曰。漢時墓碑。多門生故吏所立。往往各紀姓名於碑陰。或載所出錢數。其非門生故吏而出錢者。謂之義士。隸釋曰。掾屬曰故吏。占籍曰故民。非吏非民曰處士。素非所莅曰義士。金石文字記曰。處士者。德行可尊之人。義士則但出財之人而已。今人出財布施。皆曰信士。宋太宗朝避御名。凡義字皆改爲信。今之信士卽漢碑所稱之義士也。案今之信士。賤民亦得稱之。此義士在弟子上。又統名諸生。當是好義之士。與今之濫稱信士有別。又義士與義民同。義民見前注但一稱士一稱民耳。所蒞之民得稱

義民。見前注

義士亦然。洪氏謂素非所莅曰義士。非也。義士爲尊稱。故諸碑書法與諸生別。此統云諸生

服義。蓋雖未受業。必是弟子行也。

書分子例

義井碑陰分子云云

釋

此非墓碑。以類相從。故錄於此。隸釋曰。碑陰稱五大夫者三十一人。稱分子者六十人。漢承秦制。爵二十級。其九爵曰五大夫。漢末以貲受爵。比屋皆然。此碑五大夫所以若是之衆也。惟分子未詳。穀梁曰。燕周之分子也。注云。燕召康公之後。分子謂周之別子孫也。

陸德明音義分本或作介。姚氏薰云。分子當是別子。古別字作典。故傳本或作分。或作介。皆以古字形近而誤。

范寧時傳本未誤。故注云。謂周別子孫也。唐以後其文舛失。故疏解失之。案分子即別子。不必改從作典。范注明云。分子無從知。范本爲別子。漢時諸碑皆作分子。豈皆形近之誤耶。姚說非。

景北海碑。鴉梟不鳴。分子還

效力。謂正丁已供差徭。分子亦來助役。此碑分子似指土豪出分子。三碑皆與穀梁合。

分書奔喪持服例

王元賞碑陰載門生姓名云。右奔喪右斬杖三年。

金石錄

奔喪禮也。持服非禮也。此因書奔喪而類及之。非以持服著爲例也。金石錄曰。聖人制禮爲可繼也。禮曰。事師無犯無隱。服勤至死。心喪三年。孔子之喪。門人疑所服。子貢曰。昔者夫子之喪。顏淵若喪子而無服。喪子路亦然。請喪夫子。若喪父而無服。漢人爲王君。乃爲斬衰之服。於禮無乃過乎。隸續。景北

海碑陰行三年服者。凡八十七人。除餘叢考曰。荀爽爲司空袁逢所辟有道不應。及逢卒。爽制服三年。桓鸞爲太守。向苗所舉。孝廉除膠東令。始到官而苗卒。鸞卽去官奔喪。終三年。此爲舉主持服者。王吉被誅。屬吏桓典收斂歸葬。服喪三年。劉瓚以冤死。王允爲瓚吏。送喪還其家。終三年。乃歸。此爲長吏持服者。後魏書。公孫邃爲青州刺史。卒。佐吏疑所服。詔曰。主簿近代相承。服斬過葬。便除。可如故事。自餘無服。殊覺寥寥。可齊衰三月。則感恩知己。私自制服之例。且上達朝聽。至發詔爲定令矣。由叢考之言推之。漢末門生故吏持服。必是時王之制。故景北海之歿。持服至八十七人之多。然非周孔所許也。又案漢書龔勝傳。門人衰絰治喪者百數。後漢書荀淑傳。淑卒。李膺時爲尙書。自表師喪。陳寔傳。年八十卒。海內赴者三萬餘人。制衰麻者以百數。延篤傳。以師喪。棄官奔赴。孔昱傳。以師喪去官。李邵傳。門人馮冑。制服心喪三年。此弟子爲師也。樂恢傳。仕本郡吏。太守坐法誅。恢奔喪行服。恢死。弟子纁絰輓者數百人。傅燮傳。聞所舉郡將喪。乃棄官行服。童恢傳。聞舉將喪。棄官歸。此士大夫爲舉主也。皆叢考所遺。

分書某代門生例

高陽令楊著碑陰題名云。右後公門生。右沛君門生。

集古錄

隸釋曰。沛君。沛相統也。後公。太尉秉也。楊震拜于前。故以秉爲後。沛君者。著之從兄。後公者。著之季父。

碑文自標撰文人姓名例

處士園叔則碑。臨沒顧命曰。知我者其蔡邕。乃爲銘載書休美。

蔡中郎集

顧命二字。今人宜避。見敍。

水經注。睢水篇。漢廣野君廟碑。延熹六年十二月。雍邱令董生。命縣人葛

照爲文。用章不朽之德。此亦碑文自標撰文人姓名。附錄於此。廟碑例不更見。

碑文首書撰文人姓名。碑末書立碑人姓名。又系以詩。詩後又列同立碑人姓名例。

堂邑令費鳳碑。於是夫人元弟故□□□守卜。膺追而誄之。其辭云云。碑末故吏故鄣施業。字世堅。義民

堂邑戚忠。忠年十有一。慈考早隕。喪云云。門生功曹徐侃。字元節。云云。

隸釋

碑文渾書撰文人碑陰。詳列立碑人末作四言詩。敍故吏持服行喪之事例。

北海相景君銘。於是故吏諸生。乃作誄云云。

隸釋

碑陰。故中部督郵都昌羽忠。字定公。云云。碑陰末。豎建□

□。惟故臣吏。慎終追遠。諒闇沈思。云云。

隸續

諒闇二字。今人宜避。見敍。

碑文中敍詔册例

國三老袁良碑。帝御九龍殿。引君對覲。與酒飯。賜飲宴。冊曰云云。隸釋

吉成侯州輔碑。君懷立聖主。有安社稷之勳。建和二年七月己巳。詔冊云云。同上

碑文中敍贈卹例

太尉劉寬碑。天子閔悼惻怛。內發手筆爲策。□涕咨嗟。使右中郎將張良持節臨弔。贈車騎將軍印綬。位特進。賜珍賻。有加典禮。復使五官中郎將何夔持節。諡曰昭烈侯。隸釋

碑文中敍哀誄例

陳太邱碑。大將軍弔祠。錫以嘉諡。曰徵士陳君。秉嶽瀆之精。苞靈曜之純云云。太守南陽曹府君。命官作誄曰。赫矣陳君。命世是生云云。蔡中郎集

碑文但錄詔冊不復撰文例

漢安帝賜豫州刺史馮煥詔。告豫州刺史馮煥云云。末一行元初六年十二月。隸釋

碑文載詔書常例也。此無上下文。但錄詔書。與袁良諸人碑異。此石當亦是立於墓前。今人墓石全刊。

誥贈之文。此其權輿。

碑末或陰附錄詔冊例

中常侍樊安碑末。制詔中常侍樊安云云。末書延熹元年八月二十四日丁酉下。古文苑

詔書在元年。立碑在三年。詔書當入碑文。而繫於末。例之變。

費亭侯曹騰碑陰。惟建和元年七月廿二日己巳。皇太后曰云云。制曰云云。隸釋

隸釋曰。前一篇就國策書。乃梁太后臨朝時。後一篇乃褒贈策書。

碑末補書先世例

執金吾丞武榮碑。文末。君卽吳郡府卿之中子。敦煌長史之次弟也。隸釋

碑末附載他人例

綏民校尉熊君碑末。故長沙茶陵長文春。字季秋。嘗操貞良。慈仁汜愛。治天官日度風角列宿。明知聖術。在官脩德。民歌遺風。春秋七十。以道殞遷。宗胤不紀。故爲宣昭。故桂陽陰山豫章。長重安侯相杜暉。字慈明。體質宏亮。敦仁好道。治易梁邱春秋公羊氏。綜覽百家。無所不甄。典歷三城。居官清惠。遺愛在民。春

秋六十終。族後闕。術。故因顯德。以示來胤。隸釋

方。隸釋曰。碑後載文杜二人官壽行事。各數十言。似是同郡盛德之士。作文者惜其無所記錄。故附之左。

有誌無銘例

袁滿來墓碑。茂德休行。日袁滿來。太尉公之孫。司徒公之子。起乃假碑旌于墓表。嗟其傷矣。惟以告哀。止

蔡中
郎集

車騎將軍馮緄碑。君諱緄。字皇卿。幽州君之元子也。起故刊石表績。以誌來世。止隸釋後有數語。敘孝悌得

連蓋碑
末附錄

有銘無誌例

王史威長銘。明明哲士。知存知亡。崇隴厚壘。非寧非康云云。博物志

京兆尹樊德雲銘。於顯哲尹。誕德孔彰。膺帝休命。謂篤不忘云云。蔡中郎集

古人誌銘不必一人作，或作誌，或作銘，故二者不備。

誌文接入銘詞，不標詞曰銘，曰等字例。

太尉楊公碑，於是門人學徒相與刊石，樹碑表，勒鴻勳，讚懿德，傳億年。於戲公，惟嶽靈，天挺德，翼至神云。

蔡中郎集

太守胡公碑銘，於時陳留主簿高吉、蔡軫等咸以郡選，充備官屬，乃相與衰經庭位，號咷靈柩，遂樹碑作銘，以表令德。於藐下國，瞻仰俊乂，欽見我君，爰綏我惠云云。同上

中郎集又載瑯琊王傅蔡公碑、彭城姜伯淮碑、貞節先生范史雲碑、元文先生李子材碑、議郎胡公夫人哀讚，例並同，不備錄。

自作誌銘例

杜鄴臨終，作文曰：魏郡杜鄴，立志忠款，犬馬未陳，奄先草露，骨肉歸于土，魂無所不之，何必故邱，然後卽

化，長安北郭，此焉宴息。西京雜記

趙岐久病，勅兄子立石刻曰：漢有逸人，姓趙名嘉，有志無時，命也奈何。後漢書本傳

生題石槨例

延年益壽槨題字。永初七年四月三十日造焉。是萬壽延年益壽槨。

續隸

殁題石槨例

景君石槨銘。惟元初四年三月丙戌。景君卒。以五年二月□□□□。

釋隸

陔餘叢考曰。唐書鄭欽說傳。梁任昉。于大同四年七月。在鍾山塘中得銘曰。龜言土。蓍言水。旬服黃鍾。啓靈祉。瘞在三上。庚墮遇七中。已六千三百浹辰交。二九重三四百圮。當時莫有解者。戒子孫世世以此訪人。昉五世孫。寫以問欽說。欽說方出使。得之于長樂驛。行三十里。至敷水驛。乃悟此塚葬以漢建武四年三月十日。圮以梁大同四年七月十二日也。解在欽說傳內。則漢時銘墓。又有此一種。蓋卽莊子所謂石槨銘之類。

生壙碑末夾注年歲及其子名爵工師姓名例

梁相孔耽神祠碑末。夾行注云。子得述。父臣得錄。君故紀焉。時君年七十二。自所立作。君子颯。作內至。

室即

字漢人時已更郡諸曹史督郵。承詔紀行。手自注石。治師同縣朱適。朱祖。并作畜郭。

釋隸

隸釋曰：碑末有小字數十，敍孔君之年及其子歷官，與石工姓名。碑文云：定吉兆於天府，覩工匠之所營，心欣悅於所處。又有子得述父之句，則是孔君自作壽藏，而厥子刊石也。自營柳墓始見於禮記檀弓所載，宋桓魋事壽藏之名始見於後漢

書趙岐傳，又稱壽冢，見宦者侯覽傳，李賢曰：稱壽者取其久遠之意也，猶如壽宮壽器之類。

墓碑中兼敍他石畫象及雕畫工人例

從事武梁碑，孝子仲章、季章、季立、孝孫子僑，選擇名石，南山之陽，擢取妙好，色無斑黃，前設礮，後建祠堂。良匠衛改，雕文刻畫，羅列成行，攄聘技巧，委蛇有章。隸釋

隸釋曰：此碑長不半尋，廣纔尺許，既無雕畫技巧，亦非羅列成行，其辭決不爲碑設，似是指石室畫象。

案礮與壇同，礮與壇同，左氏襄十八年正義云：尙書爲三壇同壇，王肅本壇作坦是也。
祔葬穿中石柱題詞例

張賓公妻穿中二柱文，一書維兮，本造此窆者張賓公妻、子偉伯、伯妻孫陵，在此右方曲內中，一書維兮，張偉伯，字長仲，以建初二年六月十二日，與少子叔元俱下世，長子元益爲之祖父窆中，造內栖柱作崖

棺葬父及弟叔元。隸釋 穆案

窆皆窆之譌

隸釋曰：本張賓公之妻之穴。其子偉伯及偉伯妻與其孫陵，皆祔葬右方曲內中。故志之。其一則偉伯之孫元益葬其父並弟叔元所志也。其云建初二年，亦埋銘之椎輪。

石室題詞例

孝堂山石室題字。泰山高令明永康元年十月廿一日敬來觀記之。平原濕陰邵善君以永建四年四

月廿四日來過此堂叩頭謝賢明。

金石萃編

高睽石室太守張景題字。光和六年四月太守張景云云。又博士題字闕議采夫闕以詩書發闕京師云

云。又宏農太守張君題字。故孝廉云云。又題名闕。土成都杜宣字管偉云云。隸續

石室詳下廟碑例注。案後人謁前人墓題名石室。因記年月。如孝堂山石室題字。常例也。若高睽石室題字。張景之追遠。博士及宏農太守之通經。並刻於睽石室中。隸續曰：張景題字在高睽石室梁上。中有追念先

有少子早歿之文。前有治郡二字。蓋張君追遠之詞。博士題字亦在石室中。中云：以詩書發口京師受業春秋。口口仲舒。智非胡母。末

云道為國師。出典方州。忠著金石。張君題字亦在石室中。其文有著德義方。襲父經業。春秋尙書。海內歸高之句。與前一人皆是以經
家者。當是門生故吏。恐其無聞。刊紀德業。此如綏民校尉熊君碑。附載文杜二人也。在題辭中為變例。

石人刊字例

魯王墓石人胸前題字。一府門之卒。一漢故樂安太守廉君亭長。金石萃編

牛氏運震金石圖曰。魯王墓前東側。一石人介而執父。高五尺。腰圍七尺。刻曰府門之□。一石人冕而拱手立。領下裂文如滴淚痕。高五尺五寸。腰圍七尺五寸。胸列漢故樂安太守廉君亭□十字。兩石人並肩西向。翁氏兩漢金石記曰。予得拓本諦審之。府門之下是卒字。亭下是長字。案廟中亦有石人。

水經注穀水篇。漢廣野君酈食其廟。有兩石人對倚。北石人胸前銘云門亭長。附錄於此。後不更見。穆案

後魏鄒道昭雲峯山中石人胸前題字曰石人名髣髴

石獸刊字例

吉成侯州輔冢石獸。一刻辟邪。一刻天祿。水經注金石錄後漢書注載宗資墓石獸同見注

水經注滏水篇曰。州苞冢有兩石獸。人有掘出一獸。左膊上刻作辟邪字。金石錄曰。吉成侯州輔見後漢書宦者傳。酈道元以輔爲苞。誤。其一辟邪。道元所見。其一乃天祿字。案漢書西域傳。烏弋山離國有

桃拔。孟康曰：桃拔一名符拔，似鹿長尾。一角者或爲天祿者。

案此者字衍，當在下文兩角下。

兩角或爲辟邪。此言桃拔之

一角者，或名天鹿。桃拔之兩角者，或名辟邪也。亦有無角者。後漢書章帝紀：章和元年，月氏國遣使獻扶拔師子。李賢注：扶拔似麟無角。和帝紀：章和二年，安息國遣使獻師子扶拔。扶拔卽符拔。古玉圖譜載辟邪形，有一角二角三角無角者。蓋分言之，則無角者亦是符拔。不名辟邪。名辟邪者二角。名天鹿者一角。通言之，則一角二角無角皆可名辟邪也。圖譜又載天鹿有兩角三角之異。兩角卽辟邪而名天鹿。博古圖載周辟邪鐘凡六。其第三鐘紐兩辟邪。左右像各露一角。第五背面像各有二角。又車輅托轅凡二。一左面一右面各露一角。漢辟邪鐘二並露兩角。一角卽天鹿而名辟邪。是天鹿辟邪亦通稱也。圖譜所載雖多，後人僞作，然皆仿古鐘鼎文爲之，亦自有所本也。州輔家列二石獸而變鹿爲祿者。鹿與祿古字通，且取其吉也。隸釋載魏大饗碑云：白虎青鹿辟非辟邪之怪獸。隸續載李氏鏡銘云：白虎辟邪主除道。又曰：鏡有二獸，奮迅挈攬。二獸卽白虎辟邪也。詩騶虞，毛傳云：騶虞，白虎黑文。此鏡刻一爲騶虞，一爲桃拔之兩角者也。後漢書靈帝紀：修玉堂殿，鑄天祿蝦蟆。李賢注：天祿，蝦蟆吐水于平門外。事具宦者傳。今鄧州南陽縣北有宗資碑，旁有兩石獸，鑄其膊，一曰天祿，一曰辟邪。據此卽天祿辟邪並獸名也。漢有天祿閣，亦因獸以立名。案李說是也。水經注：沔水中蔡瑁冢前刻石爲大鹿狀。

甚大。頭高九尺。大鹿疑爲天祿。一角二角。未有明文。又汲水篇。隧前有師子天祿。其制亦同。

交趾刺史石羊刻字。□趾刺史。□君羊。

隸續

隸續曰。土人謂之鄧君冢闕。蓋墓道石羊膊上所刻。

种氏石虎刻字。光祿七年四月五日己丑。孝子种覽元博所造。

同上

案漢人墓前祠廟碑闕石人石獸之制。史無明文。水經注清水篇。漢桂陽太守趙越墓。冢北有碑。碑東又有一碑。碑北有石柱石牛羊虎。又陰溝水篇。特進費亭侯曹嵩冢北有碑。碑北有廟堂。廟北有二石闕。高一丈六尺。闕北有圭碑。碑陰又刊詔策。二碑文同。夾碑東西列對兩石馬。高八尺五寸。案此二墓祠廟碑柱石獸皆在冢北。其墓當是北向。趙越冢前有碑。碑前石柱石獸。曹嵩冢前有碑。碑前石廟。廟前石闕。闕前復有碑。又挾以二碑二石馬。此其異也。又涑水篇。漢宏農太守張伯雅墓。塋域四周壘石爲垣。隅阿相降。列於綏水之陰。庚門表二石闕。夾對石獸於闕下。冢前有石廟。列植三碑。碑側樹兩石人。有數石柱及諸石獸。舊引綏水南入塋域而爲池沼。沼在丑地。皆蟾螭吐水。石隍承溜。池之南又建石樓。石廟前。

廟當作樓

又翼列諸獸。案此墓西向。故冢前石廟。廟前碑。碑側石人石柱石獸。又前石闕。闕下

又列石獸。其右爲石樓。樓前又列石獸。其水由南而北。縈帶墓域。歸墟於丑。洵佳城也。又睢水篇。漢太尉橋元墓。冢東有廟。冢列數碑。廟南列二石柱。柱東有二石羊。羊北有二石虎。廟前東北有二石駝。駝西北有二石馬。又滢水篇。漢安邑長尹儉墓。東冢西有石廟。廟前有兩石闕。闕東有碑。闕南有二獅子。相對。南有石碣二枚。石柱西南有兩石羊。案此二墓皆南向。橋元冢前碑。冢東廟。廟前石柱。柱左迤北。至廟左。皆列石獸。尹儉墓塚對文。墓者其葬處。冢者封土爲壇。詳後墳廟在二者之間。廟南石闕。闕南獅子石碣。闕東有碑。卽在冢前。乃壇碑也。西南石羊。卽在墓前。此其異也。又案瓠子水篇。仲山甫冢。西有石廟。羊虎傾低。破碎略盡。豈此制已仿於周。而漢人增飾之與。

記冢地例

真道冢地碑。欲負冢土。勿取冢地中。法取東吉利。慎勿取西北土也。云云。延熹五年七月中旬。真道。字直中。以錢八千。從有親真敖。字政直。直弟政升。升二從弟。漢中市冢地廣廿二丈。云云。子孫但得宿山居留。不與爭舍地。云云。後冢東行廣五丈。北行不得作冢。可示後世冢前也。後世作冢。從此冢後。併墳北行門出西口地也。錄續

爾雅釋親。族。兄弟之子。相謂爲親。同姓。此云有親。親同姓也。併墳之併。與竝同。顏師古漢書武帝紀注。

竝讀曰傍。傍依也。音步浪反。史記秦始皇紀。竝陰山。竝渤海。竝河。竝即傍。蕭君令裕曰。紹興漢大吉碑云。兄弟六人。共買山地。建

初元年。造此冢地。直三萬錢。此亦記冢地也。碑首書大吉二字。附錄於此。不更爲例。

冢地書向例

郎中馬江碑。故瑩迫芒北。告斯士先君之庚地。隸釋。士即土字。

梁氏玉繩誌銘廣例云。堪輿家羅經之術。見於文中。漢以來有之矣。